


# EDENE YA SATANA

 Togumba motó. Nzambe Molingami, tozali kozongisa matondi epai na Yo na mpokwa ya lelo, mpo na libaku monene oyo epesameli biso, koya lisusu na Nkombo na Nkolo Yesu, mpo na kokutana na moyini na biso, moyini na Yo, awa na esika ya etumba; ná Liloba, mpo na kobengana ye kati na libota na Yo; mpo bamona, na mpokwa oyo, Nkolo, Pole ya Nsango Malamu. Nabondeli Yo ete ópakola miso na biso mafuta, mpo efungwama liboso na Solo; mpo tokoka kobima awa, na koloba kati na mitema na biso: “Wana ezalaki Ye kosolola na biso na nzela, mitema na biso ezalaki na móto kati na biso te?” Bikisa babeli pe bato na mawa. Pesa mpiko na baoyo balembi. Tombola maboko oyo elembi pe ezali kokita na nse. Tika ete tokoka kotalela Boyei na Nkolo Yesu, oyo tozali kondima ete ekómi pene. Tosengi yango na Nkombo na Yesu. Amen.

Bokoki kofanda.

<sup>2</sup> Nakomeka kozala mokuse na mpokwa oyo, mpo nayebi ete mingi kati na bino bauti na bituka ndenge na ndenge kati na ekólo, mpo na . . . mpo na liyangani oyo; to batikalaki mpo na yango, bamosusu kati na bino, pe basengeli kozonga, ntango mosusu bakosala mobembo molai mpo na kozonga. Pe natondi bino. Na ntongo ya lelo nazalaki na mposa ya koyoka Ndeko Neville, ngai moko. Nasila koyoka ye mbala mingi, pe mbala nyonso nayokaka ye nasepelaka na ye. Kasi liteya oyo ya ntongo epesami na ntango na yango, nayebi nakambamaki na Nkolo mpo na koyoka yango na ntongo. Ezalaki mpenza malamumu! Nasosoli mpo na nini bino pe bosepelaka koya koyoka ye. Pe akozala ntango nyonso litomba mpo na bino, nayebi yango malamumu, mpo na koyoka ye.

<sup>3</sup> Nazalaki komeka kosala makasi ete nasilisa masolo na ngai elongo na bato lelo, na ntongo ya lelo pe na mpokwa oyo. Nazali lisusu na makambo mosusu ebele, ebele, ebele ya kosala. Pe ngai . . .

<sup>4</sup> Ezalaki Yetro, nakanisi, moto alobelaki Mose na ntango moko boye, alobaki: “Mokumba yango ezali monene mingi mpo na yo.” Bongo, tozali na bandeko ebele awa oyo bakoki kotala makambo na bino. Pe makambo yango nyonso ezali na motuya, pe esengeli kotala yango na bokebi mpenza. Nazali kotinda bino epai na mokengeli na biso, to Ndeko Mann, pe epai na batei na biso mosusu awa oyo bandimaka lokola biso. Bokoki kokende epai na bango. Bakoyebisa bino mpenza likambo oyo esengeli kosala; mpo na bato mosusu, ezali nde bana na bango, mabala ya sangisa-sangisa, to makambo ya mabe. Mibali oyo bakoki mpenza kosunga bino ndenge moko lokola—lokola moto

nani mosusu, mpo ete bazali basali na Klisto. Bokende epai na bango, pe nayebi malamumu ete bako—bakopesa bino lisungi oyo bosengeli na yango. Nakoki kotala makambo nyonso wana te. Ezali mpenza ebele, bipai nyonso tozali kokende. Ezali kotonda bobele kotonda, bomoni. Pe—pe mposa ya kotala yango nyonso ezali, kasi okokoka kosala yango te. Bongo nabondelaka Nzambe ntango nyonso, na lolenge moko to mosusu, ete abongisa yango nyonso malamumu mpo na bino.

<sup>5</sup> Sikawa, na mpokwa oyo, tolingi kokamata Makomi, pe kotanga eteni ya Makomi na Genese, mokapo ya 3; pe kotala lisusu mwa moke makambo oyo tozalaki kolobela, mikolo eleki, pe tokomona, ntango tokobima, soki Nkolo Yesu akolinga kopesa biso eloko moke likolo na oyo toyebi. Nazali kosenga—kosenga ete Asala yango.

*Nyoka alekaki nyama nyonso na mokili na mayele mabe, oyo Yawe Nzambe asilaki kozalisa. Alobaki na mwasi ete, Nzambe alobaki solo ete bino bokoki kolia mbuma na nzete nyonso na elanga te?*

*Mwasi azongiseli nyoka ete, Tokoki kolia mbuma na nzete na elanga.*

*Kasi mpo na mbuma na nzete oyo ezali katikati na elanga Nzambe alobi ete, Bino bokolia yango te, pe bokomama yango te ete bokufa te.*

*Nyoka alobaki na mwasi ete, Bino bokokufa solo te,*

*Mpo ete Nzambe ayebi malamumu ete na mokolo oyo bokolia yango, miso na bino makofungwa, pe bino bokozala lokola banzambe, koyeba malamumu pe mabe.*

*Emonaki mwasi ete nzete ezalaki malamumu na kolia, pe kitoko na miso, pe ete nzete yango ezalaki malamumu mpo na kozipola bososoli na moto, akamataki mbuma yango pe aliaki pe apesaki na mobali na ye, oyo azalaki na ye elongo, ye pe aliaki.*

*Miso na bango mibale mazipwaki, pe bayebaki ete bazali bolumbu. Basonaki nkasa na mosuke, pe basalaki nkamba na kolata.*

<sup>6</sup> Tika ete Nkolo abakisa ma...mapamboli na Ye likolo na botangi ya Liloba na Ye. Sikawa nalingi kobenda liteya ya mpokwa oyo, uta na yango, pe kobenga yango: *Edene ya Satana*. Ezali mwa elobeli moko ya makasi, oyo, *Edene ya Satana*. Ezali kolandana na oyo nalobaki lomingu wana na mpokwa, nakanisi, ntango nalobelaki bino awa likolo na *Ekongoleli ya Moto oyo Azali kokanisa*, pe mposa ya mosantu.

<sup>7</sup> Ntango mosusu mwa bilobeli ya makasi boye ememaka biso na likambo moko; epusaka biso ete toyekola, pe ekotinda yo otanga Liloba. Pe yango nde likambo oyo nalingi losambo na ngai mobimba basalaka. “Moto akobika bobele na lipa te, kasi na

Maloba nyonso makobimaka na monoko na Nzambe.” Na bongo, botanga Liloba; boyekola Yango. Pe boyekola Yango ná miso na Nzambe, mpo na kopesa na mayele na bino lisosoli ya koyeba ndenge ya kobika kati na mikolo oyo.

<sup>8</sup> Sikawa, koya awa na mpokwa oyo, kaka mpo na kosolola na bino, koloba: “Ee, nakokaki kosala *boye to boye* . . .”

<sup>9</sup> Nalingaka kosolola na bato, ndenge moko nasepelaka kozonga na ndako elongo na moko na moko na bino na mpokwa. Ngai . . . Nzambe ayebi ete ezali solo. Nakosepela kozonga na ndako elongo na moko na moko na bino, pe—pe kolia—kolia bilei ya ntongo elongo na bino na ntongo, pe—pe—pe kokende bokila ya biséndé elongo na bino lobi na mpokwa, bomoni. Na—nakosepela kosala yango, kasi na—nakoki kosala yango te. Pe nakosepela kozonga na ndako, kofanda pe kosolola na bino; kofanda na mbalasan na nsima ya liyangani, mpo na kosolola na bino mwa moke, kosolola na bino na ntina na bolamu na bino pe na ntina na Nzambe. Nakolinga mpenza kosala yango. Epai na mibali pe basi oyo bazali awa; Nzambe ayebi ete nakosepela kosala yango, kasi nakoki kosala yango te. Bomoni, kobendama pe kopusama ezali mpenza—mpenza mingi.

<sup>10</sup> Pe—pe na eleko ya mitema likolo—likolo oyo tozali kobika kati na yango . . . Pe ngai moko, nazali moto ya motema likolo—likolo. Nakoki kokana likambo moko boye, “Nasengeli mpenza kosala yango,” kasi lobi ekokóma mpenza mosika na ngai; likambo moko ekoya kokota na kati pe ekosala *boye to boye*. Boye osengeli kozua ntango, mpo na kosimba makambo na motó.

<sup>11</sup> Kasi mosala monene mpo na ngai ezali nde koteya Nsango Malamu kati na Lingomba, pe kosala nyonso oyo ekoki mpo na kopesa Yesu Klisto lokumu kati na mikolo oyo, wana nazali awa na mokili, pe mpo na ntango oyo etikali na ngai na mokili. Nayeri mpo na—mpo nameka kolobela bino likambo moko oyo ekosunga bino; likambo moko. Nazalaki koyekola na ntongo ya lelo nsima na bozongi na ngai na ndako. “Eloko nini nakoloba na mpokwa oyo, Nkolo, oyo ekoki kosunga bato oyo?”

<sup>12</sup> Ntango nayokaki liteya wana ya nguya na ntongo ya lelo likolo na . . . oyo Ndeko Neville ateyaki biso, na ntina na . . . Nabanzi ete ezalaki kitoko mpenza, ndenge alobaki kuna: “Monganga akotala pe akoyeba bokono ya mobeli; kasi moto oyo akoya na sani etondi na bantonga, akotuba ntonga.” Bongo nakanisaki ete ezalaki mpenza mwa—mwa elobeli moko ya malam mpenza. Nakanisaki na ntina na yango, “ntonga, nsima na kotala pe koyeba bokono ya mobeli.” Na bongo ezali likambo moko ya kitoko mpenza.

<sup>13</sup> Nalingaki kolobela bino eloko moko, koteya eloko moko mpo na kopesa bino pole likolo na elaka na Nzambe mpo na eleko oyo. Bomoni? Eloko moko, ezali te eloko oyo moto mosusu azaláká, na eleko moko boye, kasi eloko moko . . . pe ntango . . . Makambo

nyonso wana ezali mpenza malamau; biso nyonso tobwakaka miso na nsima mpo na kotala yango. Kasi nakanisi ete nakomeka kobenda bokebi na bino likolo na eloko moko, uta na biteni ya Makomi oyo nakomi awa, oyo ekopesa bino pole, mpo na koyeba, kokómisa yo soda ya solosolo kati na etumba oyo ozali kobunda sikawa; mpo na koyekola mayele na etumba ya moyini, mpo okoka kopekisa makambo nyonso liboso ekómela yo, bomoni. Mama na likambo yango wana, ezali koyekola kokima bi—bibotu likolo na yo, na makoki na yo nyonso.

<sup>14</sup> Bongo, sikawa totala mokolo monene oyo . . . na mwa ntango moke, mokolo monene ya masumu oyo, oyo tozali kobika sikawa kati na yango. Nandimi te ete mokolo moko esilá kozala kati na oyo nasilá kotanga na lisituale . . . Mikolo ya minyoko monene ezalaki, oyo bana na Nzambe bazalaki kobomama bipai nyonso. Kasi komona bokosi ya moyini, naino tomóná te mokolo lokola oyo tozali kobika sikawa na yango. Ezali mokolo oyo eleki na mayele mabe pe na lipengwa. Pe ntango nazali komona yango, ezali kotalisa ete, Moklisto asengeli lelo kofungola miso koleka ndenge azalaki na eleko nionso mosusu.

<sup>15</sup> Sikawa, soki tozongi na ntango Roma azalaki konyokola Lingomba; soki Moklisto asali libunga, bazalaki kotinda ye na libanda ya masano pe azalaki kopesama lokola bilei epai na bankosi, to eloko moko ndenge wana, ntango bazalaki koyeba ete azalaki Moklisto mpo na litatoli na ye. Kasi molimo na ye ezalaki kobika, mpo ete azalaki mondimi ya Nzambe, ya peto, ya peto mpenza, pe na esengo nionso azalaki kotia elembo ya litatoli na makila na ye. Wana makila ezalaki kobima na misisa, to bampota na nzoto na ye, pe makila ezalaki kosopana, azalaki koganga na mongongo makasi, na kondima ya solo, pe koloba: “Yamba molimo na ngai, Nkolo Yesu!”

<sup>16</sup> Kasi sikawa, mayele mabe ya zabolo sikawa, ezali kotinda bato bandima ete bazali Baklisto nzoka nde bazali yango te. Likambo nde yango wana. Bosengeli te kotia elembo . . . Ezali—ezali ntango ya mayele mabe mingi koleka ndenge ezaláká, na ntango wana esengelaki kopesa bomoi na yo mpo na—mpo na kotia elembo na litatoli na yo. Zabolo atii mitambo nyonso ya mayele mabe oyo akokaki kotia, mpo na . . . Azali mokosi. Pe Yesu alobaki na biso, na Matai 24, lolenge mokolo oyo tozali kobika na yango ekozala, mokolo na bokosi koleka oyo esilá kozala, “ekozala mpenza kokokana na lolenge ya kopengwisa ata Baponami ya Nzambe, soko nde bakokoka kopengwisa bango.”

<sup>17</sup> Sikawa tika tokokanisa biteni ya Makomi, to bisakweli oyo elobami kati na Biblia, mpo na lelo, pe tokokanisa yango na mokolo oyo tozali kobika na yango.

<sup>18</sup> Timote ya Mibale 3, elobeli biso boye, mosakoli alobaki, ete, “Na mikolo oyo ekosalema ete, bato bakozala bato na nko, bavimbi na lolendo, baoyo bakolingaka malamau na bango

mpenza koleka bolingo na Nzambe.” Tokokanisa yango sikawa, na mwa ntango moke. Tokosala te. . . Tokoloba yango kaka na bokuse, mpo tozali na ntango mingi te ya kolobela yango nyonso na bolai ndenge tokokaki kotala yango; kasi bobele kopesa mwa pole likolo na yango, mpo bokoka kososola, pe ntango bokozonga na ndako boyekola yango. “Bato na nko, bavimbi na lolendo, baoyo balingaka malamumu na bango mpenza koleka bolingo na Nzambe; bato bazangi boboto, batongi, batomboki pe bayini na bato ya malamumu.” “Nzoka nde Molimo alobi polele ete makambo oyo ekozala na mikolo na suka.” Ezali nde mikolo oyo, esakweli elobi mpo na yango.

<sup>19</sup> Sikawa totanga lisusu, na Emoniseli . . . 14, kutu, Emoniseli 3:14, Eleko ya Lingomba ya Laodikia, ndenge lingomba ekozala na mikolo oyo ya suka. Pe ekozala, Elobami ete, “Akofanda lokola mwasi mokufeli-mobali pe akozala na bosenga na eloko te. Ye—ye azalaki mozui, asili kozua mosolo mingi, pe azalaki koyeba te ete azalaki mobola, moto na mawa, moto na bolozu, miso makufi, bolumbu, pe azalaki koyeba yango te.” Li. . . Bongo, bobosana te, Azali kolobela lingomba ya eleko oyo: “moto na bolozu, na miso makufi, bolumbu, pe azali koyeba yango te.” Eteni ya suka oyo, Liloba ya suka oyo, nde ezali kobenda bokebi mingi. Bazali kokanisa ete batondi mpenza na Molimo, ete babelemi mpenza. Eleko ya Lingomba ya Laodikia ezali nde Eleko ya Lingomba ya ba-Pentekotiste, mpo ete ezali eleko ya lingomba ya suka. Luther azalaki na nsango na ye; Wesley azalaki na nsango na ye; pe ba-Pentekotiste bazalaki na nsango na bango.

<sup>20</sup> Elobami lisusu ete: “Mpo ete ozali na móto moke, nde na móto te, na mpio pe te,” koningana ya libanda, lisosoli ya Nsango Malamumu na nzela ya mayele; “mpo ete,” Alobaki: “ozali bongo, Nakosanza yo na monoko na Ngai.” Na elobeli mosusu, komona lingomba na motindo wana ezalaki kosala Ye mpasi.

<sup>21</sup> Pe bobosana te, bango basanzaki Ye; pe Ye azalaki libanda na lingomba, koluka ete Azonga na kati, na Eleko ya nsomo ya Lingomba ya Laodikia oyo.

<sup>22</sup> Pe lelo, nzambe ya mokili oyo, moto oyo bazali kosambela na mokili oyo lelo, ezali Satana. Pe bato bazali koyeba te ete bazali kosambela Satana, kasi ezali Satana komitalisa lokola lingomba, bomoni, lokola lingomba. Bazali kosambela Satana, kokanisa ete bazali kosambela Nzambe na nzela ya lingomba, kasi ezali lolenge oyo Satana asali yango.

“Oh,” bokoloba: “zela mwa moke; biso toteyaka Liloba.”

<sup>23</sup> Botala makomi na ngai, awa, ya mpokwa oyo. Satana nde moto ateyaki Ewa Liloba liboso: “Nzambe alobaki,” bomoni.

<sup>24</sup> Ezali nde kopesa ndimbola ya mabe na eteni wana ya Makomi oyo ebongisami mpo na mokolo. Akoyebisa yo ete nyonso Yesu asalaki ezalaki mpenza malamumu. Akoyebisa yo ete

nyonso Mose asalaki ezalaki mpenza malamu. Kasi soki ekómi mpo na bilaka oyo Bapesaki mpo na ntango oyo, na ntango wana Ekómi ete ezalaki mpo na eleko mosusu. Yango nde nyonso oyo asengeli kosala, bomoni, ezali ete amema bato mpo bandima Yango na lolenge wana, pe e—esili. Mpamba te, “Okoki kolongola ata Liloba moko na Yango te, to kobakisa ata liloba moko na Yango te.” Kasi yango nde azali kosala.

<sup>25</sup> Bato, na kozanga koyeba, bazali kosambela Satana, kokanisa ete bazali kosambela Nzambe; ndenge tokebisami na esakweli, na Batesaloniki ya Mibale. Na bongo, totanga yango, Batesaloniki ya Mibale, mokapo ya 2. Totala yango mwa moke, soki nakoki kozua yango noki. Nalingi kotanga yango. Nandimi ete ezali mpenza Batesaloniki ya Mibale. Nazali na Likomi yango awa. Na Mibale. . .

*Bandeko, nazali kolomba bino mpo na boyei ya Nkolo Yesu. . . pe mpo ya koyangana na biso epai na ye,*

<sup>26</sup> Sikawa, bomoni, “boyei na Nkolo, pe koyangana epai na Ye,” ndenge Nzambe akoyanganisa libota na Ye epai na Ye na mikolo ya suka. “Koyangana ya libota epai na Nkolo,” kasi epai na lingomba te, “epai na Nkolo; koyangana epai na Ye.”

*Ete bino boningana kati na makanisi na bino te, pe. . . bobanga—bobanga te, soko na ntina na molimo te, soko na. . . liloba te, soko na ntina na mokanda te oyo emonani lokola ete euti na biso, mpo na. . . mokolo na Nkolo esili koya.*

*Tika te ete moto akosa bino na nzela nini: mpo ete mokolo yango ekomonana te bobele ete kotomboka eyei liboso pe ete moto na lofundo (“moto na lofundo,” botala malamu soki azali nani sikawa), moto na lofundo amonisama, ye mwana na libebi, (ezalaki nde Yuda, bomoni);*

*Azali kotelemela pe komitombola likolo na biloko nyonso bibiangami Nzambe, soko eloko nini na losambo, kino akofanda na tempelo na Nzambe, pe akomisakwela ete azali Nzambe mpenza.*

<sup>27</sup> Bokosi wana ya lingomba ya lelo! Bomoni, “mwana na libebi,” zaboló. “Mwana na libebi,” zaboló. Na bongo, bato bazali kosambela Satana na mikolo oyo, kokanisa ete bazali kosambela Nzambe. Kasi bazali kosambela ye na nzela ya endimeli, bibongiseli oyo esalemi na bato pe bindimeli oyo ezali komema bato mbala moko kati na bokosi monene oyo naino mokili emóná te. Ata Liloba na Nzambe oyo elakamaki mpo na ntango oyo eteyami pe etatolami ndenge nini, bakokoba koboya kondima Yango. Bakondima Yango te.

<sup>28</sup> Mpo na nini bongo? Tozali komituna mpo na nini. Mpo na nini boye; mpo na nini bakondima Yango te? Ntango Nzambe

alobaki ete Akosala likambo moko, pe Asali yango, pe ata bongo bapesi yango mokongo pe baboyi yango. Ezali lokola Ewa ayebaki likambo oyo Nzambe alobaki, oyo Nzambe akosala; kasi apesaki yango mokongo, mpo na koyoka oyo satana alingaki koloba.

<sup>29</sup> Bomikanisela, na bileko mosusu, ezalaka ntango nyonso ndenge moko. Na bileko nyonso, ezalaka ntango nyonso ete Satana amekaka kobebisela bato Liloba oyo, kosala ete bamona eleko mosusu.

<sup>30</sup> Botala, ntango Yesu ayaki, bomoni, Satana azalaki kati na etonga ya balakisi ya Bayuda wana, balabi pe banganganzambe, azalaki komeka kolobela bango ete batosa mobeko ya Mose, nzoka nde Liloba mpenza elobaki ete na mokolo wana Mwana na moto akomonisama, bomoni, ete Akomimonisa Ye moko. Na bongo, bazalaki komeka na makasi na bango ete babatela bato kati na kosambela, pe kati na botosi ya mobeko na Mose. Bomoni eloko asalaki? Azalaki komeka kolobela bango: “Eteni ya Liloba oyo ezali mpenza solo, kasi Mobali oyo azali Moto yango te.” Bomoni ndenge azali mokosi? Oyo mpenza nde mokolo yango ya bokosi.

<sup>31</sup> Ezalaka, pe ezali sikawa, Satana atii bokonzi na ye kati na mokili. Yango mpenza nde ntina azali kosala bongo, mpamba te alingi mpenza kotia bokonzi na ye moko.

<sup>32</sup> Lokola moto na mombongo, oyo azali Moklisto te, akozua miango nyonso oyo akoki kosalela mpo na komema yo omona likambo na lolenge mabe. Soki azali kolanda nti—ntina pe litomba moko, mpo na kosalisa yo likambo, mpo na komonisa yo yango lolenge wana, akolakisa yo nyonso oyo akoki, pe akosala ete omona solo na yango te, mpo azali kotala kaka bolamu na ye moko. Ata akosi pe ayibi ndenge nini, pe likambo nini mosusu, azali na litomba na ye moko.

<sup>33</sup> Yango nde ntina Satana asalaki bongo. Pe mpo na kosala yango asalelaki mosala ya koteya, ndenge Nzambe alakaki. Bongo, na Edene, abandaki na lipengwa ya kosambela, pe kobanda wana akobaki.

<sup>34</sup> Kasi ebandaki te na lisanga ya ba-koministe. Ba-koministe bazali na likambo na kati te. Ezali lingomba, nde bosengeli kosenzela na yango, bomoni. Ezali ba—ba-koministe te nde bakopengwisa baponami mpenza. Lingomba nde ekopengwisa baponami mpenza, bomoni. Ezali ba-koministe te; toyebi ete bandimaka Nzambe te, pe batelemelaka Klisto, bazali bongo na ntembe te, koloba solo, kasi bazali motemeli na Klisto *yango* te. Motemeli na Klisto asambelaka, asambelaka mpenza, akoki kotanga Makomi, pe kotalisa yango lokola nde solo mpenza.

<sup>35</sup> Ndenge Satana asalaki kuna na ebandeli, atangaki nyonso na molongo mpenza: “Nzambe alobaki: ‘Bino bokoki kolia

mbuma na nzete nyonso na elanga te.” Bomoni, atangaki Yango malamau mpenza.

<sup>36</sup> Mwasi alobaki: “Iyo, tokoki kolia mbuma na nzete nyonso na elanga, kasi nzete moko ezali katikati na elanga oyo Nzambe alobaki ete tokolia te, mpamba te, tosimba yango pe te; mpo ete mokolo tokolia yango, mokolo wana tokokufa.”

<sup>37</sup> Alobaki: “Oh, solo bokokufa te. Kasi nakoyebisa yo mpo na nini Nzambe alobaki bongo, ezali mpo ete . . .” Bomoni, bongo ye asalaki nini? Atangaki Solo yango, bomoni. Alobaki: “Yango ekofungola miso na bino, pe ekosala ete boyeba malamau pe mabe. Na ntango wana bokozala lokola Nzambe, soki bokoki kosala yango.”

<sup>38</sup> Yango mpenza nde likambo alingi kosala, pe ezali mpenza likambo yango nde azali komeka kosala lelo. Ezalaki lipengwa ya kosambela uta na ebandeli, na Edene, pe kobanda wana ezalaka bongo. Na ntango ya Adama, ezalaki lipengwa. Na ntango ya Nowa, ezalaki lipengwa. Na ntango ya Yesu, ezalaki kaka bongo. Sikawa pe ezali kaka bongo, ndenge moko, lipengwa ya kosambela!

<sup>39</sup> Sikawa, totala mokili, ntango Nzambe azalaki koyangela yango. Sikawa, ntango Nzambe azalaki koyangela yango . . . Azalaki koyangela yango. Na nsima ntango Satana abotolaki yango, na nzela ya koboya Liloba na Nzambe. Nzambe na ntango moko boye, Azalaki koyangela mokili. Atiaki yango na esika na yango. Atiaki yango, atiaki yango na mosala. Asalaki biloko nyonso, Azalaki koyangela yango. Sikawa tokokokanisa yango nsima na Satana koyangela yango.

<sup>40</sup> Nzoka nde, Nzambe azuaki mibu nkoto motoba. Elingaki kozua Ye ntango molai boye te, kasi Azuaki ntango molai boye. Mibu nkoto motoba, mpo ete bateyaka biso ete “mokolo moko na Lola ezali mibu nkoto na mokili,” pe ezalaki mibu nkoto motoba, to mikolo motoba oyo Nzambe asalaki mokili. Na bongo, Nzambe azuaki mibu nkoto motoba mpo na kosala yango, kolona mimboto malamau kati na yango pe kotoyisa biloko nyonso yengebene na lolenge na yango. Biloko nyonso esengeli kobota yengebene na lolenge na yango. Mimboto na Ye nyonso ezalaki malamau, na bongo esengelaki kobota yengebene na lolenge na yango. Nzambe azuaki mibu nkoto motoba.

<sup>41</sup> Na suka, ntango Asilisaki kosala yango nyonso, pe na suka biso . . . na suka kartié générale ya mokili etiamaki na esika moko ya kitoko mpenza, na ngambo ya ésti ya Edene, oyo ebengamaki elanga na Edene. Nzambe asalaki kartié générale ya mokili na elanga na Edene, na Ezipito, na suka mpenza ya ésti ya elanga nde esika kartié générale ezalaki.

<sup>42</sup> Pe likolo na biloko nyonso wana, Atiaki mwana na Ye ya mobali pe mwasi ya mwana na Ye, ete bayangela biloko nyonso wana. Ya solo. Yango nde likambo Nzambe asalaki. Apesaki



bango bokonzi mobimba. Bakokaki koloba na mipepe, pe yango ezalaki kotika kopepa. Bakokaki koloba na nzete, pe ezalaki kolongwa *awa* pe kokende *kuna*.

<sup>43</sup> Nkosi ná nkoi bazalaki kolia esika moko, pe mwana na mpate azalaki kolala elongo na bango. Mabe ezalaki te. Kimia oyo ebongi be ezalaki, boyokani oyo ebongi be, biloko nyonso ezalaki kati na kobonga be, pe na ntango wana Nzambe azalaki na bokonzi na Ye likolo na yango. Pe botala, Azalaki na oyo ya Ye. . . Azalaki na mokili na Ye, Asalaki ete nyonso etambola malamumu. Asalaki ete nyonso ekola malamumu. Nyonso ezalaki kolia nkasa; eloko moko te ezalaki kokufa, eloko moko te ezalaki kobeba, eloko moko te ezalaki kobebisama. Eloko moko te. . . Ezalaki bobele kobonga be.

<sup>44</sup> Pe likolo na nyonso wana, Atiaki bana na Ye ya bolingo, mwana na Ye ya mobali pe mwana na Ye ya mwasi, mobali na mwasi, mpo na koyangela yango.

<sup>45</sup> Nzambe asepelaki mpenza! “Pe Apemaki na misala na Ye nyonso, na mokolo na nsambo,” Abulisaki mokolo na nsambo oyo pe Akómisaki yango sabata mpo na Ye.

<sup>46</sup> Mpamba te, Nzambe atalaki biloko nyonso wana, nsima na Ye kozua mibu nkoto motoba mpo na kopota pe kobongisa yango, kosala ete ezalisama; pe Atelemisaki bangomba, pe Asalaki ete uta na ba-volkan bangomba ya milai ebimá, pe biloko nyonso oyo esalemaki ntango ba-volkan ezalaki kotoka; Akaukisaki yango, pe Abongisaki yango na lolenge Akanaki. Pe ezalaki esika moko kitoko mpenza.

<sup>47</sup> Eloko ya kokokana na yango ezalaki te, paladiso ya nkembo ya Nzambe! Pe ba-dinosór minene, pe soko nini mosusu, oyo ezalaki kotambola na libumu, pe banyama minene; mabe ezalaki kati na bango te. Bazalaki na boboto lokola mwana na nyáo. Bazalaki ata na likambo moko te; bo—bokono te, mawa te; ata mikolobe moko oyo ekokaki komema bokono na mokili ezalaki te. Oh, oyo nde esika!

<sup>48</sup> Bandeke minene bazalaki kopimbwa nzete na nzete, pe Adama azalaki kobenga bango na nkombo na bango, pe bazalaki koya kofanda likolo na mapeka na ye pe—pe koyemba na litoi na ye. Pe, oh, esika ya kitoko nini boye Nzambe azalaki na yango!

<sup>49</sup> Pe na nsima, Abimisaki moko na makoki na Ye uta na Nzoto na Ye moko. Nzambe azali na makoki kati na Nzoto na Ye.

<sup>50</sup> Ndenge moko, yo ozali etaliseli ya tata na yo. Pe, tala, yo ozalaki kati na nkoko na nkoko ya nkoko na yo. Kasi, na yango, toloba, tokamata yango lokola yo ná tata na yo. Na bongo, oyebaki eloko moko te ntango ozalaki kati na tata na yo. Momboto ya bomoi eutaka na mobali. Mobali azalaka na selíle ya makila; mwasi azalaka na li—liki; bongo, nzoka nde, selíle ya makila ezalaka na bomoi kati na yango. Pe, na bongo, ntango

ozalaki kati na tata na yo, ya solo oyebaki eloko moko te na ntina na yango. Kasi, nde, zebi pe Liloba na Nzambe ezali kotalisa polele ete ozalaki kati na tata na yo, kasi oyebaki eloko moko te na ntina na yango.

<sup>51</sup> Kasi na ntango wana, tata na yo azalaki na mposa ya koyeba yo. Pe uta na kovanda na ye ná mama na yo, na bongo epesi nzela ete tata na yo ayeba yo. Sikawa, ozali elili ya tata na yo. Ozali lokola ye, pe biteni ya nzoto na yo mosusu ezali lokola ya tata na yo.

<sup>52</sup> Bongo, yango nde lolenge Nzambe azalaki na ebandeli. Mwana mobali nyonso ya Nzambe pe mwana mwasi nyonso ya Nzambe azalaki kati na Nzambe na ebandeli. Bozali komikanisela na yango sikawa te, kasi bozalaki kuna. Ayebaki yango. Pe Azalaki na mposa ete okóma boye mpo Akoka kokutana na yo, kosolola na yo pe kolinga yo, pe kopesa yo mbote ya loboko.

<sup>53</sup> Okolinga te ete mwana na yo mpenza ya mobali... Ezali mokolo monene te ntango mwana na yo ya mobali azongi na ndako pe afandi na mesa? Ntango auti na etumba, to eloko ya ndenge wana, nzoto etondi na mapipi; okolengela bilei; okoboma mwana ngombe ya mafuta, to eloko mosusu, pe okobongisa yango mpo na ye! Azali mosuni pe makila na yo mpenza, pe azalaki kati na yo. Na ntango wana oyebaki ye te, kasi oyebaki ete azalaki wana.

<sup>54</sup> Ndenge moko Nzambe ayebaki ete tokozala awa, kasi na nsima Atiaki biso kati na nzoto mpo tokoka koyebana. Mpo Akoka koyebana, Akómaki moko na biso ntango Akómaki Yesu Klisto, Mwana na Nzambe Ye moko, litondi ya komonisama ya Nzambe. Na bongo, yango ezalaki mwango na Nzambe, ya komitalisa kati na lisanga na bandeko.

<sup>55</sup> Ntango nazalaki kati na tata na ngai, nayebaki eloko moko te. Kasi ntango nakómi mwana na ye pe nabotami uta na ye, nazalaki etaliseli, eteni ya tata na ngai. Yo pe ozali eteni ya tata na yo.

<sup>56</sup> Pe lokola bana na Nzambe, tozali eteni ya etaliseli ya Nzambe oyo ezalaki kati na Ye, oyo ekómaki mosuni lokola Ye akómaki mosuni, mpo tokoka kokota na bondeko biso na Ye, lokola libota na Nzambe na mokili. Pe yango ezalaki mwango na Nzambe uta na ebandeli. Iyo, misie. Yango nde oyo Nzambe alingaki kosala uta na ebandeli.

<sup>57</sup> Azalaki na bokonzi likolo na biloko nyonso. Atiaki moto likolo na elanga na Edene, na bonsomi ya kopona; Alobaki: "Mwana, ezali ya yo."

<sup>58</sup> Esika kitoko nini boye! Nzambe asepelaki mpenza, kino Akendaki na Ye pe Apemaki na misala na Ye. Nzete moko te ezalaki kobimisa nzube pe nsende. Mbuma moko te ezalaki

kobima na nzete ya nzube. Nyonso ebongaki be. Mimboto nyonso ebongaki be. Biloko nyonso ezalaki na lolenge oyo ebongi be.

<sup>59</sup> Bongo, ntango Akei kopema mwa moke, moyini na Ye amikotisaki na lipengwa na ye, pe azuaki bokonzi, na kolimbola mabe mwango na Nzambe epai na bana na Ye. Nzoka nde, Ye Atiaki motema na mwana na Ye moko; ndenge botielaka mwana na bino ya mwasi motema ntango abimaka na mpokwa elongo na mobali moko; ndenge botielaka mwana na bino ya mobali motema ntango atambolaka elongo na molangwi to momeli makaya. Bomoni, Atiaki motema na mwana na Ye, ete akosala eloko ya mabe te, pe akobatela Liloba nionso oyo Ye alobaki. Kasi moyini amikotisaki; lokola mobali moko oyo apakoli pomade na suki pe abimisi mwana na yo ya mwasi pe abiki mabe na ye; to—to mwasi moko oyo akozua, oyo abimi na mwana na yo ya mobali, pe asali ndenge moko. Bomoni, amikotisaki. Moyini na Nzambe amikotisaki pe apesaki Ewa ndimbola mabe ya Liloba.

<sup>60</sup> Sikawa, ye, na nzela na kokweisama oyo, azuaki bokonzi pe akómisaki elanga na Edene eloko na ye moko. Abotolaki yango. Pe sikawa asili kokokisa mibu nkoto motoba ya koyangela na ye ya lipengwa; kopengwisa bato, bana na Nzambe, lokola asaláká ndele. Mpamba te, bazalaki na bonsomi ya kopona, mpo basala ndenge balingi. Pe bazalalaki kondima ete bakosala malamumu, to bazalaki kolikia ete bakosala malamumu, kasi tala basalaki mabe, pe batekaki makoki na bango ya bokulutu, lokola Esau, mpo na mokili. Bongo Satana alongaki, pe abotolaki yango. Pe asili kozua mibu nkoto motoba mpo na kotonga Edene na ye, ndenge Nzambe azuaki mibu nkoto motoba mpo na kosilisa kotonga Edene na Ye. Pe na nzela na lipengwa, lipengwa na Liloba, to ya bato, atii sikawa Edene na ye moko na mokili oyo, kati na lisumu.

<sup>61</sup> Edene na Nzambe etiamaki kati na boyengebene. Edene na satana etiamaki kati na lisumu, mpamba te Satana azali lisumu. Nzambe azali boyengebene, pe bokonzi na Nzambe etiamaki kati na boyengebene, kimia pe Bomoi. Bongo Satana atii oyo ya ye kati na lisumu, pe, lisumu na lolenge ya kosambela.

<sup>62</sup> Botala ndenge apengwisaki, lipengwa na ye, ndenge alobaki ete akosala. Alakaki akosala yango. Moto moko ayebaki yango? Tokamata Yisaya, soki bosengeli na biteni ya Makomi oyo. Soki bo. . . Nabanzi, nasengelaki kotanga biteni yango ebele. Tokamata Yisaya mokapo ya 14, mwa ntango moke, pe totala mpenza likambo oyo Satana alobaki kuna, mwa moke. Na Yisaya 14, tokotanga yango, pe tokotala malamumu likambo moto oyo asalaki. Yisaya 14, kobanda na molongo ya 12.

*Osili kokwea longwa na lola boni! E monzoto na ntongontongo, mwana na kobima na moi! Osili*

*kokatama kino mabele boni! Yo oyo ozalaki kolonga mabota.*

*Olobaki na motema na yo ete, Nakobuta na lola, nakotia ngwende na ngai likolo na minzoto (elingi koloba bana mibali), minzoto na Nzambe; Pe nakofanda na koyangana, . . . epai na likolo mosika;*

*Pe nakobuta likolo na esika na mapata, pe nakomizalisa lokola Oyo-Aleki Likolo.*

<sup>63</sup> Sikawa bokokanisa likambo oyo ná biteni ya Makomi mosusu oyo toutaki kozua na Batesaloniki, ndenge alobaki: “Afandi na tempelo na Nzambe, azali komitombola likolo na biloko nyonso bibiangami Nzambe, kino ete basambela ye lokola Nzambe, lokola Nzambe na mokili.”

<sup>64</sup> Tala nzambe ya mokili oyo nateyaki bino lomingo eleki. Ye oyo lelo kati na lipengwa, na ngonga ya mayele mabe oyo, ntango ya nsomo oyo tozali kobika na yango. Ezali ntango oyo eleki na nkembo kati na bileko nyonso, mpo ete tokómi lisusu pene na Bokonzi monene ya mibu nkoto; tokómi lisusu pene na Edene. Kasi bobele na eleko oyo, lipengwa nyonso pe mayele ya etumba nyonso oyo naino asalela te pe oyo akoki kopengwisa na yango, asangisi yango nyonso pe amibakiseli makasi; pe ayei lokola Nzambe, pe azui esika ya Nzambe; azali mosambeli, pe akoki kotanga Makomi pe koteya yo Makomi, mpenza lokola Satana asalaki epai na Ewa na elanga na Edene. Kasi nyonso oyo asengeli kosala, ezali nde kolongala eteni moko na Yango, kofungola mwa lidusu wana, epai mbondo na malakisi ya zabolo ekokota, lokola Ekongoleli na moto oyo azali kokanisa oyo tolobelaki na mpokwa wana.

<sup>65</sup> Bongo, alobaki ete akomitombola likolo na Oyo-Aleki-Likolo; akobuta likolo na mapata pe na minzoto, pe akofanda kuna lokola Nzambe, pe akozala likolo na Oyo-Aleki-Likolo. Pe alongaki kokokisa miango na ye ya mabe. Na ntembe te azuaki mpenza elonga kokokisa miango na ye ya mabe, na bileko nyonso, bato bapengwisamaki na ndimbola na ye ya kokitisa motuya ya Liloba na Nzambe oyo elakami na eleko wana. Ezali mpenza bongo nde asalaki. Na bileko nyonso, azalaki kosala bongo.

<sup>66</sup> Na mikolo na Nowa, alimbolaki ete ekokaki kosalema te mbula ebeta uta na likolo, mpo ete, “mbula ezalaki kuna na likolo te.” Nsango malamun monene ya zebi na ye oyo ateyaki na elanga ya Edene! Akokaki kotinda bisalelo kino na sanza pe kotalisa polele ete mai ezalaki kuna na likolo te. Kasi Nzambe alobaki mbula ekobeta. Kasi Satana alongaki, pe abebisaki makanisi na bato, na nzela ya bolukiluki ya zebi, ete, “ekoki kosalema te.” Kasi esalemaki. Nzambe alobaki ekosalema, pe esalemaki. Asalaki yango.

67 Sikawa, na mikolo na—na Yesu, asalaki ndenge moko. Abebisaki lisusu makanisi na bango na nzela ya bokosi, bomoni, na kolimbolaka Liloba mabe. “Soki ozali Mwana na Nzambe, sikawa tika namona Yo kosala likambo moko na ntina na yango.”

68 Yesu asalaki maseki na ye te. Asalaki yango soko moke te. Nzambe azali moto ya maseki te. Asengeli koyanola ata moke te bosenga ya Satana. Asengelaki bobele. . . Yesu alobaki: “Ekomami ete, ‘Okobika te. . . Moto akobika bobele na lipa te, kasi na Maloba nyonso makobimaka na monoko na Nzambe.’” Bomoni, Asengelaki kosala maseki te, na ye. Asengelaki kosala lipa te. Akokaki kosala yango, kasi Alingaki koyoka nde zabolo, na bongo asengelaki koyoka zabolo te.

69 Pe lisusu, ezali lisumu na lolenge ya kosambela, lokola na ebandeli, lipengwa mpenza. Botala yango malamumu. Ezali mpenza lisumu ya mokolo na mokolo te, kosala ekobo pe kolangua masanga, pe kozua Nkombo na Nzambe mpamba. Ezali yango te. Te.

70 Bobosana te eleki mwa mibu, mingi kati na bino awa, bato ya kala, bobosana te liteya oyo nateyaki likolo na *Kokamwa na mokolo ya kosambisama*. Mwasi na pite, ye akokamwa kuna te. Ye ayebi esika azali kokende. Molangwi ye akokamwa kuna te. Momeli na lotoko, mosani na masano ya mbongo, mokosi, moyibi, ye akokamwa te. Kasi, moto oyo akanisaka ete azali kati na solo, kokamwa nde yango wana.

71 Ezali nde moto wana, oyo alobaka, oyo ayaki koloba: “Nkolo, nateyaki Nsango Malamumu te, nabenganaki milimo mabe, na Nkombo na Yo te?”

72 Yesu alobaki: “Bolongwa na bino. . . mosika na Ngai, bino bato na misala na nko. Nayebi bino soko moke te.” Yango nde kokamwa yango, bomoni, lipengwa yango.

73 Yango nde likambo oyo ntango nyonso ngai. . . wana nde esika nasosolami mabe. Ezali te ete nalingi kokesana na bato mosusu. Ngai nalingi kozala ndenge mosusu te, kasi nasengeli kozala sembo. Nazali na Nsango moko, pe Esengeli kopesama epai na bato. Ezali mpo na yango nde ezali kosololama mabe mingi kati na bato. Bazali kokanisa ete ngai natelemelaka bato nyonso. Soki bakoki koyeba, ngai nazali mpo na bato nyonso, pe nazali kosala nyonso ekoki mpo nateya bango Solo, kaka ndenge etiami na motema na ngai pe ndenge ekomami awa na Biblia. Pe Nzambe azali kotalisa polele ete ezali Solo, na bongo likambo mosusu ya kosala mpo na yango ezali te. Bongo, batala Yango, to batala te.

74 Bomoni, balingi kotala Yango te, mpo ete basili koteka nyonso, bateki makoki na bango ya bokulutu epai na ebongiseli, epai na lingomba ebongisami; mpo na komeka makoki na bango ya bokulutu, ya kokende na Lola likolo na moboko ya losambo

oyo ebongisami, oyo Satana azali mokonzi na yango nyonso. Nzambe naino azuá losambo ebongiseli te, mokolo moko te. Pe bazali koteka nyonso mpo na yango, nzoka nde bango, etonga na bato, bazali kolimbola Liloba pe bazali koloba Yango elingi koloba *boye* pe Yango elingi koloba *boye*.

<sup>75</sup> Nzambe azali na bosenga ya molimboli te. Alimbolaka Ye moko. Asengeli na moto mosusu te mpo na koyebisa Ye ndenge ya kosala. Azali mokonzi. Alobaki ndenge Akosala yango, pe yango nde lolenge Asengeli kokokisa Liloba na Ye. Ntango Alobaki: “Bilembo oyo bikolanda bango bakondima,” yango nde Alingaki koloba. Nyonso Alobaki ekosalema, Alobaki ekosalema na mikolo oyo na suka, ete Akosala makambo boye na boye, pe Asali yango. Asengeli kotuna moto moko te soki ntango ekoki to te. Ayebi ntango oyo ekoki, pe mwango oyo ebongi.

<sup>76</sup> Sikawa, Satana, mopengwisi oyo, ndenge elobami na Matai 24:24, na lipengwisi ya makasi. Sikawa, tozali komona ete na miango ya nsango malamumu na ye ya boyebi, ya koyekola malamumu, na bizaleli ya bomoto, na sivilizatio, pe bongo na bongo, aloki bato oyo balingi kosalela Nzambe, ete bandima lokuta na ye.

<sup>77</sup> Ewa alingaki kosala yango te, kasi atalisaki ye lolenge likambo yango ezalaki na bwanya. Ye ayebaki te; alingaki koyeba. Asosolaki te, kasi alingaki kososola. Pe Nzambe ayebisaki ye aluka kososola te.

<sup>78</sup> Ndenge nini ngai nakoki kososola makambo oyo? Nakoki kososola yango te. Nandimaka yango. Nasengeli kososola yango te. Nzambe azali kondima, kasi kososola te. Tondimaka bobele oyo Ye alobi.

<sup>79</sup> Sikawa, tokokanisa Edene ya Nzambe na oyo ya Satana sikawa, nsima na mibu nkoto motoba oyo abebisi ndimbola ya solo ya Liloba na Nzambe oyo elakami mpo na eleko. Tokokanisa yango sikawa, pe totala epai tokómi. Lokola likambo asalaki na lingomba na—na ntango ya Klisto, na Yesu, amekaki kopekisa—kopekisa bana mpenza ya Nzambe mpo bayeba Solo. Baoyo ya Nzambe. Nzambe atiaki bana na Ye awa, bitaliseli na Ye, mpo bazala na boyokani na Ye na nzela ya koyoka Liloba na Ye.

<sup>80</sup> Nini ekosalema soki tata na yo alobaki na yo, pe ozali mwana ya botosi mpo na tata na yo, pe alobaki na yo: “Mwana na ngai, kokende kosukola na mai oyo kuna te, mpo ete bangandó bazali na mai wana?”; pe moto moko ayei na nsima, alobi: “Na ntembe te, mai kitoko ya boye, bangandó bazali na kati te?” Sikawa yo okoyoka nani? Soki ozali mwana ya solosolo, okoyoka nde papa na yo.

<sup>81</sup> Pe mwana na Nzambe ya mobali to ya mwasi ya solosolo, azuaka liboso nde Liloba na Nzambe. Oyo moto mosusu akoloba etali ngai te, bazuaka liboso nde Liloba na Nzambe. “Mbondo ezali kati na kopo,” pe bazali kondima yango.

<sup>82</sup> Kozala na kondima na Liloba nyonso, Mimboto na Ye, ebimisaki Edene ya bosantu, ya bolingo, pe ya Bomoi na Seko. Yango nde Edene na Nzambe ebotaki, bosantu. Pe ebimisaki Edene moko ya bosantu, ya bolingo, ya lisosoli, ya kobonga be, pe ya Bomoi na Seko. Yango nde Nzambe azali kolona, Liloba na Ye, Mimboto na Ye. Yango nde Lingomba na Ye ekozala na suka; Ekozala ndenge moko.

<sup>83</sup> Botala, likanisi moko yango oyo. Bobosana yango te. Nakozongela yango na ntango moko to kati na Liteya mosusu. Kasi, boyebi, Nzambe alobaki: “Tika momboto moko na moko ebota na lolenge na yango.” Yango ezali mobeko na Nzambe? Na bongo litomba nini na motei, to moto nani mosusu, komeka kosala ete Liloba eloba eloko mosusu? Bomoni, Liloba na Nzambe moko na moko ezali Mimboto. Yesu alobaki bongo: “Momboto oyo moloni alonaki.” Na bongo soki Malako 16 ezali Liloba na Nzambe, ekobota na lolenge na yango. Soki Malaki 4 ezali Liloba na Nzambe, ekobota na lolenge na yango. Pe bilaka mosusu nyonso esengeli kobota na lolenge na yango.

<sup>84</sup> Bomoni, bomoni Satana awa na komibomba na ye? Azali komeka koloba: “Oyo te, ezali bongo te.” Bozali kososola? [Losambo balobi: “Amen.”—N.D.E.] Bomoni, Satana alobi: “Oh, Likambo wana ezali mpo na eleko oyo te. Yango, yango—yango ezali. . . Yango ezalaki mpo na eleko mosusu. Likambo wana, elingi ata koloba bongo te.”

<sup>85</sup> “Momboto moko na moko esengeli kobota na lolenge na yango.” Yango nde lolenge Nzambe atiáká Edene na Ye. Boye te? [Losambo balobi: “Amen.”—N.D.E.] Pe yango oyo, ezali lolenge oyo Nzambe atongi Lingomba na Ye, Liloba moko na moko na lolenge na Yango! “Moto akobika bobele na lipa te, kasi na Maloba nyonso makobimaka na monoko na Nzambe.” Bomoni? Satana, ye akozua eloko mosusu. Kasi Nzambe alobi: “Momboto moko na moko na lolenge na yango.”

<sup>86</sup> Soki elaka elobi: “Bilembo oyo bikolanda bango bakondima.”

<sup>87</sup> Sikawa lingomba ezali koloba: “kota na lingomba. Tanga bisakola. Yekola katekísimo.” Makambo wana ezali na kati ya Biblia te.

<sup>88</sup> Kasi Yesu alobaki: “Bilembo oyo bikolanda bango bakondima: na Nkombo na Ngai bakobengana milimo mabe; bakoloba na minoko na sika; soko bakolokota banyoka, to bakomela eloko na kufa, ekosala bango mabe te; soko bakotia maboko na bango likolo na babeli, bakobika.” Moto nani akomeka koangana likambo Yango? Bomoni?

<sup>89</sup> “Momboto moko na moko ekobota na lolenge na yango.” Soki ozali momboto na Nzambe, etaliseli, mwana na Nzambe, na bongo Liloba na Nzambe elonami kati na yo. Bomoni? Pe na nsima ntango okoyoka Liloba na Nzambe, “Bampate na Ngai

bakoyokaka mongongo na Ngai; bakolanda mopaya te.” Bososoli yango? “Na bongo momboto moko na moko ezali kobota na lolenge na yango.”

<sup>90</sup> Sikawa tomoni ete, momboto moko na moko ezalaki kobota na lolenge na yango, kufa ezalaki te na oyo ya sika . . . na Edene yango. Kufa ekozala te na Edene ya sika. Bomoni, eloko te, eloko mosusu ezalaki te bobele bosantu, bopeto, pe Bomoï na Seko.

<sup>91</sup> Sikawa, kozanga kondima na Liloba na Nzambe mobimba, ememaki momboto ya kozanga bosantu kati na Edene ya Satana. Tokómi sikawa na esika oyo Satana akofanda na ngwende na ye, lokola motemeli na Klisto, kati na—na Edene ya mokili oyo, Edene moko ya masumu, ya kosambela oyo ebebisami. Abandaki koloba te: “Ngai nazali Satana. Ngai nde mwanje monene.” Te, abandaki bongo te, kasi abandaki kobebisa Liloba na Nzambe. Pe ezali nde bongo atongaki bokonzi na ye, na bileko nyonso. Pe sikawa kati na eleko monene ya lipengwa oyo, abelemi mpo na kofanda na ngwende na ye, na nzela ya bato na ye! Amitongeli Edene moko ya mayele ya bongó, ya boyekoli, ya zebi; ndenge moko, batei ya zebi, lingomba ya zebi, bato na likindo ya zebi, makambo nyonso ya zebi. Makambo nyonso etongami likolo na boyebi. Lingomba mobimba etongami likolo na boyebi. Etongami likolo na kondima te.

<sup>92</sup> Mokolo moko, nakendeki kosala liyangani na losambo ya moto moko. Ezalaki ndako moko monene kuna na wésti. Mobali moko malamú, pe azalaki koboya makambo oyo tozali kolobela. Kasi nde, azalaki . . . nalingaka ye; moto moko malamú, azalaki mokólo. Ntango losambo na ye esilaki . . . Ezali na bifandelo ya bato pene na nkoto motoba. Ntango losambo na ye esilaki, na liyangani ya nsima na nzánga, pene na bato nkoto na nkama mitano, bango nyonso bazalaki bato na mayele pe balataki kitoko. Nafandaki wana pe nazalaki kotala bango malamú.

<sup>93</sup> Mobali yango ateyaki liteya moko kitoko. Pe na nsima atunaki soki moto moko alingi koyamba Klisto; atombola kaka loboko. Pe ata moto moko atombolaki loboko te. Pe sukasuka mwasi moko atombolaki maboko. Alobaki: “Malamú, okómi sikawa Moklisto,” pe amemaki ye na libatisi. Pe na nsima ntango mobali yango abimi . . . Apambolaki bebe moko, apepwaki bebe yango pe abondelaki mpo na ye, pe asukisaki losambo.

<sup>94</sup> Ntango losambo na ye ebimaki; bango nyonso bato malamú, bato batangá, bato bayekolá. Na nsima natelemaki pembeni, mpo napesa mobali yango mbote pe natombela ye lisungi na Nzambe, ezalaki ye kobima.

<sup>95</sup> Pe na ntango yango, etonga na ngai ekomaki. Bakokaki kopesa bango nzela ya kokota te ntango etonga na ye ezalaki wana. Baoyo ya ngai bakómaki, na bakiti ya bibosono, likolo na ba-brankar, na kazaka ya kokanga, bato ya maboma, pe nyonso



mosusu. Bomoni bokeseni? Yango wana. Tala likambo nazali kolobela, bomoni. Bomoni, ezali eloko moko ya ndenge mosusu.

<sup>96</sup> Nzoka nde, na boyebi ya zebi okoki koteya Nsango Malamu *oyo bato bakoki kososola*, ete, bino, “Ye oyo akondimela Yesu Klisto akokweisama te,” bomoni.

<sup>97</sup> Kasi, “Bilembo oyo bikolanda bango bakondima,” bomoni, azangi kotia Yango wana, bomoni. Mwasi yango andimelaki Yesu Klisto, abikisamaki, soki bilembo oyo ezali kolanda mondimi.

<sup>98</sup> “Pe ye oyo akoyoka Liloba na Ngai,” kaka kotanga maloba te, koyoka Yango na matoi na ye te, kasi, “kososola Yango.” Moto nyonso akoki koyoka Yango; mwasi na pite akoki koyoka Yango pe kotikala mwasi na pite; bomoni, molangwi akoki koyoka Yango; mokosi akoki koyoka Yango pe kotikala mokosi. Kasi, “Ye oyo akososola Liloba na Ngai, pe akondima Motindi na Ngai, azali na Bomoi ya Seko.” Yango wana, bomoni.

<sup>99</sup> Pe moto moko te akoki kosala yango, bobele ete Nzambe ayeba ye liboso. Yesu alobaki: “Moto akoki koya epai na Ngai te bobele ete Tata abenda ye, pe bato nyonso Tata asilá kopesa Ngai bakoya epai na Ngai.” Amen. Nyonso ezali kotalela bokonzi pe boyebi liboso ya Nzambe. Azali kobika Ye moko pe moto moko te akoyebisa Ye nini Asengeli kosala.

<sup>100</sup> Bongo, kozanga kondima, na kozanga kozua Liloba na Nzambe mobimba, ebotaki momboto ya kozanga kondima, ya kozanga bosantu, ya masumu, ya koyina, pe liwa ya Seko ezali kati na eleko oyo ya lingomba ya mayele, oyo etondi na masumu. Sikawa bososoli yango? Na mikolo oyo, wana mokili mobimba ezali kosambela! Boyebaki yango? Mokili mobimba ezali kosambela. Pe na eleko ya kosambela oyo, bandakonzambe minene ezali na balabala; nyonso, nyonso wana ekosuka na kosambela Satana. Yango oyo, awa mpenza kati na Biblia. Ezali solo. Pe na biteyelo ya likindo ya mayele, oyo ebimisaki moto ya mayele oyo ayekolaki lolenge ya koloba, ya kosala makambo, ya kobenda bokebi ya bato; pe makambo lokola koyekola bizaleli, mbula misato to minei mpo na koyeba lolenge ya makanisi ya moto. Bomoni, ezali . . .

<sup>101</sup> Molimo na Nzambe ezali te eloko oyo, yo, ekotiámá kati na yo na nzela ya kelasi. Ezali eloko oyo ebongisámá liboso kati na yo, na loboko na Nzambe na Nguya Nyonso. Kobikela makambo mpo na yo ezali na nzela ya kelasi to koyekola te. Yango ebongisámá liboso, na loboko na Nzambe pe na boyebi makambo liboso ya Nzambe, kati na yo. Ya solo.

<sup>102</sup> Bongo, yango ebotaki Edene monene oyo bazali kobika kati na yango sikawa, lingomba ya Edene ya mokili. Bango nyonso bazali sikawa kosangana kati na Lisanga monene ya Mangomba, pe bakosala lingomba ya mokili mobimba, bango nyonso bakozala na nse ya motó moko, epai Satana akofanda na ngwende, bongo mpenza.

103 Pe mbela ya suka ezali kosakolama, mpo na kozua Mwasi na libala liboso ete Akota kuna. Mpamba te, soki akoti kuna, pe azui elembo na nyama, pe akweisami, akobima kati na yango lisusu te. Yango wana elobami ete: “Bobima kati na bango, bino bato na Ngai,” liboso akota kuna na kati, bomoni. “Bobima kati na bango, pe bokabwana.”

104 Bongo, koyina pe liwa, pe bokabwani ya Libela na Nzambe, kati na Edene oyo; bilulela, mbindo, libebi, (ndenge nini?) na kolonaka momboto ya mabe.

105 Ezali kokanisela ngai emononeli oyo namonáká liboso na ngai kokutana na ba-Pentekotiste, ya Moto wana azalaki kotambola na mokili, na bilamba ya mpembe. Boyóká ngai koloba yango mbala mingi. Pe moto mosusu ayaki na nsima na Ye, azalaki kolona momboto ya kozanga boyokani.

106 Kasi alongaki mpenza, kati na Ewa . . . na elanga na Edene, na mposa mabe ya Ewa mpo na lisumu; mposa mabe ya Ewa, mpo na lisumu. Na bongo, soki Ewa azuaki mposa mabe ya boyebi, ezalaki lisumu.

107 Pe ntango tozali na mposa mabe ya boyebi, tolingi kozua lipolome ya filozofi, lipolome ya droit, kosala bongo ezali lisumu. Ezali maloba moko makasi, kasi ezali Solo. Ata ezali makasi ndenge nini, ezali kaka Solo, bomoni. Kozala na mposa mabe ya boyebi, ya lisosoli!

108 Likambo yango ezali, ezali, lelo tozali koluka kotia Liloba na Nzambe kati na mitema ya bato te. Tozali koluka komitia biso moko. Mangomba ezali koluka kotia malakisi ya lingomba, na motema ya moto.

109 Esengeli na biso kofandisa Liloba na Nzambe. Polo alobaki: “Nayaki epai na bino na maloba ya elengi ya bato te, ete kondima na bino ekoka kotongama te likolo na mayele ya bato; kasi nayaki epai na bino na nguya; na komonisama ya Molimo Mosantu, ete kondima na bino ekoka kovanda kati na Nzambe.” Yango wana.

110 Moto akoki komitia ye moko te. Tomoni yango kati na . . . Soki Nzambe asali likambo epai na moto moko pe atindi ye, bokomona bato nyonso koluka komekola yango. Bomoni, bazali koluka komitia bango moko. Moto nyonso: “Ngai, nasálá boye. Ngai, ngai, oyo ya ngai, ebongiseli na ngai, ngai, boye,” bazali komitia bango moko. Tozali koteya nini, biso moko to Bokonzi na Nzambe?

111 Botia nde Liloba na Nzambe. Bolongola kozanga kondima na motema ya moto pe bokotisa Bokonzi na Nzambe. Pe Bokonzi na Nzambe ekoki kotiyama kati na motema na moto te, bobele Nzambe asala moto yango bongo. Ekoki kotiyama te kati na . . .

112 Pe, bomikanisela, lipengwa kati na yango ezali ete moto akanisi ete azali kati na solo. Bomoni? “Nzela ezali oyo emonani

malamu epai na moto.” Moto nyonso ya mayele amonanaka lokola azali na solo.

<sup>113</sup> Lokola naye bisaki bino eleki balomingu; ntango nazalaki pembeni na bebé na ngai oyo azalaki kobunda na liwa, Satana azalaki wana pe alobaki: “Papa na yo akufaki na maboko na yo na mpokwa wana. Mwasi na yo atiami kuna na—na ndako ya bibembe, pe bebé na yo ye oyo, azali kokende. Pe osengi Ye ete ayanola yo, pe Akitisi yo . . . Akitisi ridó moindo liboso na yo. Sikawa, Ye nde Azali Nzambe malamumu, pe yo olobaki ete Azali Mobikisi na nzoto. Pe yo moto otelemaki mpo na koloba ozali na solo, okwei na likambo.” Oh, mabanzo nyonso, makanisi nyonso ya bongo esengelaki kondimama ete ezali solo; pe alongaki, kino wana.

<sup>114</sup> Alongaki pe ntango alobelaki Ewa: “Miso na bino makofungwama, pe bokoyeba malamumu ná mabe. Pe bokokóma lokola banzambe, ndenge wana, na koyebaka malamumu ná mabe,” mpamba te, Nzambe apesaki bango naino nzela ya koyeba te ete bazalaki bolumbu. Na bongo bayebaki ete bakoyeba malamumu ná mabe; pe alongaki. Kasi, bomoni, yango ekesanaki na Liloba na Nzambe.

<sup>115</sup> Ezali pe bongo nde batei bakendeke na makindo basalaka, koyekola makambo ya kosambela ebongisami na bato; ekoki komonana lokola solo, ekoki kozala lolenge ya malamumu ya kososola likambo, kasi ezali libunga.

<sup>116</sup> Tosengeli kososola Yango te. Tozali kondima Yango mpo Nzambe alobi ezali bongo, pe ezali kokata likambo mpo na libela. Likambo mobimba, bandimaka Yango nde bongo.

<sup>117</sup> Oh, boni Ewa azalaki na mposa mabe ya kozala na lipolome ya filozofi, bomoni, boni azalaki na mposa mabe ya kozala na mayele koleka!

<sup>118</sup> Botala boni kokokana ezalaki makasi, kati na mobali ná mwasi na ye . . . Sikawa botala, mobali ná mwasi, bango nyonso mibale bazalaki bolumbu kati na elanga na Edene, na Edene na Nzambe.

<sup>119</sup> Sikawa nalingi kosukisa. Nalobaki nakozua bobele mwa miniti moke. Botala, botala malamumu sikawa, wana nazali kosukisa.

<sup>120</sup> Tokokanisa yango sikawa, kokokana ezalaki makasi kati na mobali ná mwasi na ye, bango nyonso mibale kati na Edene ya Nzambe, bazalaki bolumbu mpenza, kasi bayebaki yango te. Mpo na nini bayebaki yango te? Mpo ete, na oyo etali bolumbu, biyokeli na bango ezipamaki, na Ezipeli ya Bulee, ya Molimo Mosantu. Bakokaki kotalana, kasi bayebaki te ete bazalaki bolumbu. Bazipamaki na Molimo Mosantu, ya bosantu. Bazipamaki.

<sup>121</sup> Ezipeli ya Nzambe, lelo lisusu, ekoki kotala kasi ekolula te. Bakobalola motó na bango. Ezali Ezipeli ya Bulee, bomoni, Ezipeli ya Bulee. Nzambe asimbaki miso na bango. . . bazalaki bango mibale, moko azalaki mobali pe mosusu azalaki mwasi, kasi bayebaki te ete bazalaki bolumbu, mpo ete bosantu ya Nzambe ezalaki kozipa miso na bango. Botala malamumu, Nzambe abatelaki lisosoli na bango mosika na masumu, na nzela ya Ezipeli ya Bulee.

<sup>122</sup> Ekokaki tozala na ntango mpo na yango, mwa moke. Botala malamumu awa: “Mpamba te ye, awa esili mosambeli kopetwa mbala moko libela,” Baebele, “awa esili mosambeli kopetwa mbala moko libela, azali lisusu na masumu kati na lisosoli na ye te.” Likambo ya lisumu esili mpo na ye.

<sup>123</sup> Nayokaki Ndeko Neville koloba na ntongo oyo; ntango mosusu moto moko atunaki ye mpo na nini nateyaka likolo na Molimo Mosantu te, mpo na nini ngai nasalaka likambo *boye* te. Ntina yango oyo. Molimo Mosantu ezali mosala kati na yo. Ezali Bomoi, koningana te; ezali te lolenge moko ya ndanga na nzoto. Kasi ezali nde Moto, Yesu Klisto, Liloba na Nzambe oyo efandi kati na motema na yo, mpo na kopesa bomoi na Liloba moko na moko ya eleko oyo. Ya solo. Botala malamumu Molimo Mosantu kati na mosala, ezali te na komonisama ebele-ebele, kasi kati na mosala, oyo Yango ezali kosala kokokana na Liloba.

<sup>124</sup> Sikawa botala malamumu Molimo Mosantu, Liloba Mosantu ya Nzambe, esalaki ete mobali pe mwasi bazalaki bolumbu, kasi bayebaki yango te. Ezali malamumu mingi, Bomoi ya Liloba; Momboto, Liloba!

<sup>125</sup> Nzambe alobaki: “Nzete moko ezali katikati na elanga, mwasi. Pe na katikati ya elanga, nzete moko ezali wana; bosimba yango soko moke te. Mpamba te, mokolo bokolia yango, mokolo yango bokokufa.” Bazipamaki na ezipeli ya bulee liboso na yango, bayebaki ata eloko moko te, mbele basimbaki yango te.

<sup>126</sup> Bazipamaki na ezipeli ya bulee. Bazalaki na kimia kati na hema na Nzambe. Bazalaki na bomoi. Kufa ezalaki nzinga-ninga na bango te. Aleluya! Bazalaki na bolingo ebongi be moko mpo na mosusu, Bomoi ebongi be mpo na libela. Bazalaki na bolingo ebongi be, lisosoli ebongi be ya bolingo na Nzambe. Bazalaki na Liloba ya Nzambe, pe bazalaki kotosa Yango. Bazalaki na bomoi pe na kimia kati na Edene ya Nzambe, pe kufa ata moke te ezalaki nzinga-ninga na bango.

<sup>127</sup> Na nsima, Satana amemaki Ewa koyoka nsango malamumu na ye ya likindo, nsango malamumu ya boyebi, kelasi ya likolo, bizaleli ya malamumu, sivilizasió ya malamumu, koyekola ya likolo, pe bongo na bongo; na bongo, ntango amemaki. . . ye kotelema pe koyoka ye mwa moke, koyoka makanisi na ye (yango biso tosendeli kokweisa), ntango amemaki ye koyoka yango.

128 “Bongo, botala malamumu, lingomba ezali *boye na boye*. Ebandaki uta kala. Biso tozali moko na mangomba ya kala kati na ekólo. Mokambi na engumba ayaka awa.” Makambo wana etali ngai te, bomoni. Soki ezali kotelemela Liloba na Nzambe, yo pe telemela yango. Yango nde moyini na yo. Eloko nyonso oyo ezali kotelemela Liloba ezali moyini na yo.

129 Nyonso oyo ezali mpo na Liloba ezali ndeko na yo. Ezali eteni na yo.

130 Botala, mwasi alongolaki Ezipeli ya Bulee, mpo na koyeba soki koyebana nzoto ezali mpenza nini; bokokanisa yango, eloko nini mposa mabe ekosala. Alongolaki Ezipeli na miso na ye, eloko ya bulee oyo Nzambe atiaki na miso na ye. Azalaki na mposa mabe ya boyebi, mpo na koyeba nyonso na ntina na yango; na bongo alongolaki Ezipeli mpo na komona nyonso na ntina na yango. Mwasi ayokaki zabolo, pe botala esika yango ememaki ye.

131 Basalaki lolenge moko na eleko moko na moko oyo elandaki, kozua ntango nyonso ngambo ya mayele ya bongó; pe sikawa bokonzi ya Satana etongamaki, boyebi, momboto oyo alonaki, pe ekómisaki mokili Edene ya liwa.

132 Sikawa botala. Sikawa botala Emoniseli 3, Eleko ya Lingomba ya Laodikia. Bokanisa yango naino.

133 Sikawa botala malamumu. Ye, Ewa, azali mwasi-mokonzi ya Satana. Bomoni, Satana, nyoka, akendeki epai na Ewa liboso na Adama kokende epai na ye. Bomoni? Ya solo. Na bongo apengwisaki mwasi, bomoni; na bongo Satana, nyoka, azalaki mobali ya Ewa liboso ete Adama ayeba ye. Bomoni, apengwisaki mwasi. Biblia elobi bongo, pe na ntango wana, mwasi ayebaki ete azalaki bolumbu. Bomoni?

134 Sikawa botala e—Eleko ya Lingomba ya Laodikia. Ye, Ewa, afandi lokola mwasi-mokonzi ya Satana. “Azali mozui na biloko ya mokili; mokufi miso, bolumbu lisusu, pe ayebi yango te,” kaka ndenge azalaki na elanga na Edene. Kasi sikawa, ezali te mpo ete Ezipeli ya Bulee ezipi elongi na ye, kasi ezipeli ya mposa mabe. Yango wana, alongoli Ezipeli Mosantu ya Nzambe, pe alati ezipeli ya boyebi, mpo na mposa mabe. Pe sikawa azali na ezipeli ya mposa mabe, oyo ekomisi ye “mokufi miso,” mpo na oyo ezali lisumu. Azali “bolumbu” na balabala, “pe ayebi yango te.” Azali mwasi na pite na balabala. Basi oyo balataka bakupé, na miso na Nzambe, bazali basi na pite, “pe bayebi yango te.”

135 Botala, bokamata basi na biso. Bongo, soki bolingi koyeba lolenge ya lingomba, botala lolenge basi bazali kobika. Mwasi atalisaka ntango nyonso lingomba. Na Edene ya Satana, ya masumu pe kozanga kondima, ya libebi na kosambela; bokonzi oyo ebebisami. Na esika ya kozua Liloba na Nzambe, bazuaki nde boyebi ya mayele ya bato. Pe na esika ya kozua Lingomba,

bazuaki ebongiseli, pe bazali komema yango nyonso na nse ya mokonzi moko monene.

<sup>136</sup> Sikawa botala, abebisami uta na bosembo na ye. Sikawa, bozanga likambo oyo te. Lingomba elatisamaki ná ezipeli oyo ya mposa mabe. Botala epai ememi ye. Yango—yango ebebisi ye, longwa na bosembo na ye pe ekomisi ye na boyebi. Bomoni? Na Ezipeli ya Bulee, azalaki sembo; na ezipeli mposa mabe, azali boyebi. Ayebi ezali na elengi. Ayebi litomba na yango, bomoni. Ezali mbuma, nzete kitoko, mpo na kofungola mayele. Bomoni? Abebisami longwa na bosembo pe akómi na boyebi, longwa na bosantu kino na mbindo pe mposa mabe, pe longwa na Bomoi kino na liwa.

<sup>137</sup> Bokonzi oyo esengeli kokufa. Bokonzi oyo ekokufa! Nzambe ya Lola akoboma yango nye pe akolongola yango na mokili.

<sup>138</sup> Botala, kati na libebi oyo, mobali akómi mwasi, pe mwasi akómi mobali, “pe bayebi yango te.” Mbuma yango mpenza ya Edene ya Satana, soki botali na balabala lelo, bato na biso ya mikolo oyo.

<sup>139</sup> Botala, Satana asalelaki nde Ewa mpo na komema Adama ete asala lisumu na nguya ya mposa mabe na ye. Sikawa ndenge moko, azali kosala ndenge moko lelo. Botala malamú, suki akati, elongi apakoli-pakoli, bilamba ekangi ye nzoto, bomoni, azali kosala yango, pe ayebi te ete makambo oyo nyonso ekesani na Liloba na Nzambe. Kokata suki na ye, ezali kokómisa ye mwasi ya nsoni, mwasi ya ndumba. Kolata bakupé, ezali kobwaka ye libanda na ngolu. Kolata bilamba ezali kokanga nzoto, ezali kokómisa ye mwasi na pite. “Pe ayebi yango te,” ezali te mpo na bosantu na Nzambe, ezali nde mpo na mposa mabe ya Satana. Mwasi asalaki ete mo. . . Asalaki ete Adama akóma na mposa mabe mpo na ye.

<sup>140</sup> Mwasi alongolaki bilamba oyo Nzambe alatisaki ye, kuna na Edene, mpo na mobembo na ye kati na—na lisobe oyo. Alongolaki yango. Amilongolaki bilamba. Nzoka nde, Nzambe azipaki ye mobimba na mposo ya banyama; ye abandaki kolongola yango moke-moke, sikawa azongi ndenge azalaki na ebandeli.

<sup>141</sup> Sikawa amemi Adama na ye ete álata bilamba na ye ya nse. Mobali oyo alati kupé ya moke ya basi, pe abimi na yango libanda, nandimi te ete azali mpenza mobali. Azali mpenza suka na efeminé. Bomoni? Bomoni, mwasi amemi Adama na ye oyo abebisami ete ásala lokola ye, bomoni, álata bilamba na ye ya nse. Amonaki makambo oyo akoki kosala ntango alongolaki bilamba na ye nyonso pe atikalaki bobele na bilamba na ye ya nse. Ezali ba-kupé. Na ntembe te, yango ezali bilamba ya nse mpo na basi, pe tala Adama na ye azali kolata yango sikawa. Pé, kokokana na Liloba na Nzambe ya ebandeli: “Ezali mbindo mpo na mwasi kolata elamba ya mobali, pe ezali mbindo mpo

na mobali kolata elamba ya mwasi,” uta na Liloba ya ebandeli. Bokanisa yango!

<sup>142</sup> Sikawa, mobali oyo sikawa akomi kosala suki lokola mwasi. Azali kosopa suki yango na elongi, azali kotia yango bigudí. Moko na makambo ya mabe koleka oyo námoná na bomoi na ngai, ezali nde bilenge ya lelo oyo, ná mwa basuki na bango ekiti *boye*, pe bapakoli yango langi, balongoli suki yango langi na nkisi moko boye, bazali kolongola langi na suki na bango, pe bazali kozinga yango na ba-bigudí, mpo na kolalisa suki. Ba-efeminé! Ezali likambo makasi ya koloba uta na eteyelo, kasi kosambisama ebandaka na ndako na Nzambe. Bozali ata koyeba te soki bozali mibali to basi. Pe nayokaki ete mampinga ya basoda na biso ya Amerika, nsima na ntango moke, bakobanda kolata bakupé. Ezali solo. Bozali komona libebi yango? Ezali bilamba ya basi; bazali kosala suki lokola basi.

<sup>143</sup> Mokolo wana nazalaki kuna, na Howard Johnson; oyo ya awa te, kasi oyo ezali na balabala kobima na engumba. Pe nafandaki wana na kokamwa. Tala elenge moko azalaki koya, monoko polele. Azalaki na suki ya moindo *awa*, asopaki yango na ngambo oyo *boye*; pe atiaki bigudí, pe azingaki yango na mosanda ya miso, azalaki kotala ná yango na miso, azalaki kotambola. Bomóná naino libebi ya ndenge wana te! Bomoni, ye akondima yango te. Ntango mosusu akoki kotalisa polele ete azali mobali, kasi na molimo na ye, azali mwasi. Ayebi ngámbo oyo ye azuami te. Ezali solo. Libebi nini boye!

<sup>144</sup> Yango nde likambo Satana azali kosala. Abebisi bikólo. Abebisi lingomba. Abebisi bato. Azali mokosi, mobebisi ya Solo ya ebandeli.

<sup>145</sup> Nzambe asalaki mobali ete azala mobali. Asalaki mwasi ete azala mwasi. Alatisaki bango na bokeseni, pe oyo Alingaki mpo na bango ezali ete batikala ndenge wana pe basalaka ndenge wana; moko azali mwasi, pe mosusu azali mobali. Akabolaki Adama na elanga na Edene, pe Asalaki yango, Akabolaki ye na Ewa.

<sup>146</sup> Sikawa akómi kosala suki lokola mwasi; mwasi akómi kokata suki lokola mobali, pe ye azali komeka kobongisa suki na ye lokola mwasi. Bomoni? Mwasi azali kolata bilamba na ye ya likolo, pe mobali azali kolata bilamba na ye ya kati. Nzoka nde, ezali komonana kotuka, kasi nazali koloba yango bongo te. Ezali mpenza Solo ya Nsango Malamu. Soki oyebi yango te, loba ete eloko moko mabe ezali kati na yo; to ozali mokufi miso, to naino obima na balabala mokolo moko te. Mwasi azali kokanisa, mobali pe azali kokanisa ete ezali malamau, bayokani na bango.

Basi balobaka: “Ee, molunge ezali makasi!”

<sup>147</sup> Mibange ya ba-Indien-Apache bakoki koyokisa bino nsoni. Koleka molunge ezali kokóma makasi, koleka bazali kobakisa bilamba, mpo na komibatela na moi; oh, etokisaka bango,

na bongo bakoki kozua ekoliseli ya mopepe, wana bazali kotambola. Bomoni? Bazalaka mpenza na nse ya moi.

<sup>148</sup> Okokoka koyikela yango mpiko te; mposo na yo ekotelema-telema pe okozika. Kasi, bomoni, yango nde bazali kobenga koyekola ya likolo. Zebi ya mikolo oyo nde eboti yango. Hólalá! Mwasi yango ye oyo, “bolumbu,” na Laodikia, “pe ayebi yango te.”

<sup>149</sup> Mwasi azalaki bolumbu na Edene. Bomoni ndenge bokonzi nyonso mibale oyo ekokani? Moko ezali ya masumu pe ya liwa; mosusu ezali ya Bomoi pe boyengebene. Kuna azipamaki na Ezipeli ya Bulee. Bango mibale bazalaki bolumbu; bayebaki yango te. Bayebaki ata likambo moko te, mpo bazipamaki na Molimo na Nzambe.

<sup>150</sup> Pe awa, bazipami na mposa mabe, pe bazali kotalana mpo na . . . Bomoni, Adama akokaki kotala Ewa, pe ayebaki te ete azalaki bolumbu. Kasi sikawa, ná ezipeli oyo ya mposa mabe, mwasi azali kososola te ete azali bolumbu, kasi azali kosala yango na nse ya ezipeli oyo ya mposa mabe mpo mibali batala ye. Yango nde ntina moko oyo mwasi akoki kosala yango. Bondimi yango te, kasi ata bongo bozali kosala yango, pe mibali bazali kotala. Pe mibali basosoli ete bozali kobenda bokebi mingi, kino bakómi kolata bilamba na bino.

<sup>151</sup> Oh, libebi nini boye! Eleko nini boye! Ntango nini tozali. . . Boni ezali kopengwisa! Oh, makambo nyonso oyo, “pe bayebi yango te,” molimo oyo ebebi mpenza ezali kati na mobali. Azipami na mposa mabe ya Satana, mwasi pe lokola. Ezali molimo ya satana, ya lisanga monene. Bomoni, bazali koyeba te, kasi bazali ebongiseli. Basi oyo balataka bakupé, bazali bato ya ebongiseli. Mibali oyo balataka bongo, bazali bato ya ebongiseli. Nakopesa bino nkombo na yango na bokuse: B.S.S., Big Sister Society [Lisanga monene ya Bandeko Basi—N.D.E.], na bongo, bazali nde bato na yango. Bakendeke kuna, lisanga monene ya ba-éfémíné, balati bapatalo ya mike-mike ya kala, ya masusamasusa pe ya bosoto. Ngai—ngai. . .

<sup>152</sup> Mibali, ntango mosusu bokoki koboya likambo oyo ngai nalobi, kasi ezali Solo. Bopengwisami kasi boyebi yango te. Bozali lisusu te, bozali lisusu kosala makambo lokola mibali te. Bomoni, balembi makasi; pe, bana na bango, eloko moko ekozala lisusu kati na bango te; mibali ná basi lokola. Bazali lisanga. Ebongiseli moko ezali. Mpo na nini? “Yoane, mozalani ya ndako elandi, alataka bakupé, mpo na nini ngai te? Louisa alingaka ete nalata yango, mpo ete Yoane, mozalani ya ndako elandi, alataka yango. Pe, ee, soki—soki Suzie-Jeanne akoki kolata yango, Malata-Jeanne pe alataka yango, to Suzie-Lou,” to nkombo na ye ezali nani, bomoni. Bomoni, ezali lisanga. Ezali ebongiseli. Na molimo, bozali bato na yango, pe bozali koyeba yango te.



153 Pe soki ezali bongo, pe tozali komona ete ezali bongo, na bongo bozali bakufi miso. Bokufi miso liboso na mangomba ebongisami oyo Satana akotisi bino na kati na mayele mabe. Ezali kobebisama ya Liloba na Nzambe, ya ebandeli, pe ya Bokonzi na Ye, pe ya mwango na Ye mpo na bana na Ye. Satana akotisi mibali pe basi kati na makambo oyo na mayele mabe na ye, pe bayebi yango te. Kobebisama!

154 Azali lisusu mwana na Nzambe te! Na basuki oyo ekiti na elongi na ye, pe alati kupé, azali kotambola na balabala; pe ye mwana na Nzambe, mosungi kati na lingomba, mokengeli na eteyelo? Te, azali mwana na Nzambe te. Aleka naino na ekongoleli ya makanisi na Nzambe te. Mbele alingaki kolata bilamba ya basi te; na ntembe te alingaki kolata yango te; mbele mwasi pe alingaki kolata bilamba ya mobali te. Bomoni, azali mwana na Nzambe te. Azali mwana mobali ya Satana, pe mwana mwasi ya Satana. Ezali makambo makasi mpo na koloba yango!

155 Satana alongaki kobebisa pe kokonza mokili oyo, pe kokómisa yango bokonzi na ye; bato batiamaki awa, na bonsomi ya kopona, mpo bapona bango moko lolenge ya bomoi oyo balingi. Pe yango ezali kotalisa oyo ezali kati na motema na yo. Omoni? Mongongo na yo. . . Boyebi likambo oyo? Misala na bino elobaka makasi mingi, ezali komela mongongo na yo. Iyo!

156 Soki nakei epai ya mobali moko. Pe alobi: “Oh, ngai. . . Bisu nyonso tozali Baklisto. Tozali bato ya lingomba.” Pe bafóto ya basi bolumbu ebakami na biró na ye? Ha! Makambo oyo akolobela ngai ezali na ntina te, nakoyeba malamumu koleka, ata pe yo.

157 Ndakisa mwasi oyo alobi azali Moklisto, na suki mikuse? Te-te! Boyebi malamumu koleka yango, bomoni. Iyo, misie. Alobi azali Moklisto, bongo azali kopakola-pakola, azali kolata bakupé, pe alobi azali Moklisto? Boyebi malamumu koleka yango. Liloba na Nzambe ezali koteya malamumu koleka wana. Liloba elobi ete akoki kosala yango te pe amibenga moklisto. Azali ata na lokumu te, pe nyonso wana. Lolengenini Nzambe akotia eloko ya nsoni kati na Bokonzi na Ye? Te, misie, ata moke te. Te, misie. Bango moko bazali kolakisa mposa na bango.

158 Okoki komema ebenga ete alia esika moko na nzéngó te, ata moke te. Ebenga azalaka na mai ya bololo te. Akoki kolia bipoli wana te. Soki alei yango mwa moke, ekoboma ye, pe ayebi yango. Kasi nzéngó akoki kolia eloko nyonso oyo alingi. Bomoni? Atondi na mai ya bololo.

159 Pe na bongo, bomoni ete ezali nde bongo na mokili lelo, ndenge moko, “Bazali bolumbu, bakufi miso, pe bayebi yango te.”

160 Satana asalaki yango na nzela ya mposa mabe ya mwasi mpo na boyebi, mpo na mposa ya nzoto, pe aponaki yango ye moko. Sikawa botala, Ewa moto amemaki Adama kati na

mabe, pe mwasi moto alongolaki bilamba na ye liboso Adama na ye alongola bilamba na ye. Bomoni? Ezali nde mwasi, ntango nyonso. Ezalaka ntango nyonso bongo. Ezali kokoba kaka bongo.

<sup>161</sup> Lingomba nde etangolaka motò na nzela. Ezali lingomba, bomoni, nde etangolaka motò oyo azali na mposa ya kozala mwana na Nzambe. Ezali nde mwasi, lingomba. Kasi Biblia te, Nzambe, mpo ete Biblia ezali mobali. Oh, iyo, “Liloba ekómaki mosuni,” pe Azalaki Mobali. Bomoni? Biblia ezali mobali; lingomba ezali mwasi. Bomoni? Ezali lingomba te nde. . .Biblia nde ezali kotangola mobali na nzela. Lingomba nde ezali kotangola ye na nzela. Akómaki bolumbu nde mpo na lingomba, mpo na Biblia te. Bomoni? Te, soko moke te. Biblia ezali koyebisa ye ete azali bolumbu. Iyo, misie.

<sup>162</sup> Sikawa botala ndenge nini, na nzela ya nzoto, na mposa ya nzoto, azalaki na mposa mabe ya boyebi, ya koyeba ntina na likambo *oyo*, pe ndenge nini, soki mbuma yango ezalaki kitoko to te. Pe asalaki yango.

<sup>163</sup> Kasi mokolo moko Nzambe akozua yango lisusu, na nzela ya Mobali moko. Etekamaki na mwasi moko. Kasi esikolamaki na Mobali moko; Mobali yango, Yesu Klisto, oyo azali Liloba.

<sup>164</sup> Pe nini ekosalema na nsima? Botala, mpo na kosukisa. Eumeli te awa, nalobaki maloba oyo. Nazali naino na nkasa pene na minei to mitano, kasi ngai. . . ya biteni na Makomi pe nyonso oyo nalingaki kolobela. Kasi, boyoka. Tosukisa na koloba boye.

<sup>165</sup> Bokanisa yango, eumeli te awa, nateyaki bino likolo na Bakelelo Nsambo, eyenga ya Bakelelo, pe oyo nyonso mosusu. Pe nalobaki: “Eyenga moko ya mokolo na mwambe ezali.” Bongo, mokolo ya nsambo ekozala mokolo ya suka, ekozala Bokonzi ya mibu nkoto. Kasi eyenga moko ya mokolo na mwambe ezali; pe, soki ezalaki mokolo ya mwambe, pe mikolo ezali bobele nsambo, ekotangama lokola mokolo ya liboso lisusu, tokozonga mbala moko na mokolo ya liboso. Bongo, ntango Bokonzi ya mibu nkoto ekosila, na nsima Edene mosusu ekotiana. Bokonzi monene ya Nzambe ekozongisama lisusu. Mpamba te, Yesu abundaki na Satana kino na suka, na elanga na Getesemane, Abotolaki lisusu Edene; yango nde Akendeki kobongisa na Lola, mpo na kozonga lisusu, kuna na Lola. Alobaki: “Tika mitema na bino mitumolama te.”

<sup>166</sup> Ntango Azalaki awa na mokili, Alobaki: “Bino, Bayuda, bondimelaki Nzambe. Bongo, Nayebi ete nazali na lokumu te,” Alobaki: “Pe bazali koloba ete Ngai nazali *boye*, na *boye*. Kasi, bondimaka Nzambe; pe lokola bondimaka Nzambe, bondima pe Ngai.” Azalaki Nzambe, oyo amonisami. Bomoni? “Bondima pe. . .”

<sup>167</sup> “Na ndako na Tata na Ngai, ebele ya. . .” To: “Na nkita na Tata na Ngai, na miango ya Tata na Ngai bifandelo bizali

mingi. Nakokende kobongisela bino esika.” Botala bonene na yango, kilometele nkoto misato na nkama mwambe na mitano! Toloba, ezali wapi? Akei kobongisa yango. Ye azali Mokeli. Asali biloko nyonso wana na wólo. Balabala ezali komonisa lokola talatala. Ye azali Mokeli. Azali kobongisa esika. Na Emoniseli 21, elobami: “Pe ngai Yoane namoni Mboka mosantu, Yelusaleme na Sika, kokita na likolo, kouta na Nzambe.”

<sup>168</sup> “Mai monene pe ezalaki lisusu te; likolo ya liboso pe nse ya liboso esilaki kolongwa.” Likolo na biso ya liboso ezalaki nini? Ezalaki Bokonzi ya mibu nkoto. Nse ya liboso ezalaki nini? Ezalaki nde oyo. Ekozonga lisusu ya sika. Kaka ndenge ebatisamaki na Nowa, na mikolo na koteya na ye; ebulisamaki na Klisto, ntango Asopaki makila na Ye likolo na yango; pe ekozonga lisusu ya sika, mikolobe pe biloko mosusu nyonso ekolongwa, ntango ekozongisama sika na suka, na libatizi ya Móto, oyo ekoboma mikolobe nyonso, bokono nyonso, mpasi nyonso, bosoto nyonso oyo ezalaka na mokili.

<sup>169</sup> Ekopasuka, Mokili ya Sika ekobima. “Namoni Likolo ya Sika pe Nse ya Sika. Likolo ya liboso, mokili ya liboso oyo, esilaki kolongwa; mai monene pe ezalaki lisusu te. Pe ngai Yoane namoni Mboka mosantu, Yelusaleme ya Sika, kokita na likolo, kouta na Nzambe.” Kuna Nzambe akozala elongo na bitaliseli na Ye ya solosolo, bana na Ye ya mibali pe ya basi, epai Akoki kozala na boyokani na bango kati na bosantu, ná miso na bango ekufi liboso na masumu. Kobanda wana, lisumu ekozala lisusu ata moke te.

<sup>170</sup> Tosala makasi na biso nyonso; bopengwisama na mokolo oyo te, kasi, “Bosala makasi mpo na kokota na ekuke na nkaka.”

<sup>171</sup> “Mpamba te baoyo bakotikala libanda ekozala bato na pite, bato na mposa mabe.” “Ye nani akotala mwasi na mposa mabe, asili kosala na ye ekobo.” Baoyo nyonso. . . basi ya bomoi mabe bakozala libanda, mibali ya bomoi mabe, pe bongo na bongo.

<sup>172</sup> Pe baoyo basikolami, pe bazali kati na Buku na Bomoi ya Mwana na Mpate, bango nde bakokota na ekuke. Na bongo, bosala makasi, baninga; bopengwisama te na mokolo oyo ya suka.

<sup>173</sup> Oyo ezali ntango monene. Moto nyonso azali na mbongo. Moto nyonso akoki kosala likambo *oyo*, pe moto nyonso akoki kosala likambo *oyo kuna*, pe mbongo ezali koleka bipai na bipai, ná mítuka minene, pe nyonso. Ata moko na yango ekozala kati na Mboka wana te. Ata mótuka moko te ekozala kuna, ata mpepo moko te. Te. Ekozala na mobimba sivilizasió moko ya ndenge mosusu. Ekozala lisusu sivilizasió ya boyebi te, ya zebi te, kasi ya bosembo, pe ya kondima Nzambe na bomoi.

<sup>174</sup> Tosala makasi ete tokota Kuna. Mpamba te, yango nde ntina mobimba oyo nazali kolanda, ezali ete mokolo moko nakota na Mboka wana; pe ekobaluka ngai boye, namona bino koya elongo

na ngai, moko na moko na bino kotambola, wana tozali koyemba, “ntango basantu bakokota.” Nalingi kozala moko kati na bango, ntango basantu bakokota.

Tobondela.

<sup>175</sup> Molingami Tata na Lola, lokola ntango ekomi na suka, pe tozali komona ete ekómi mpenza pene, elaka ekómi mpenza pene. Tosengi na Yo, Nzambe Molingami, ete Okoma yango likolo na mitema na biso, mpo tosala libunga te. Nzambe Molingami, batela lisosoli na biso peto. Batela mitema na biso ezipami, Nkolo, miso na biso ezipama liboso na makambo ya mokili oyo, pe makambo ya mpamba ya mokili oyo, na lokumu ya mpamba ya kokóma moto monene.

<sup>176</sup> Ata soki bazali bato minene ndenge nini, bakonzi nyonso, bankúmú, bankúmú minene, pe bamosusu nyonso bakokufa, pe bakosekwa te na oyo ya miba- . . . na lisekwa ya liboso. Mpamba te ekomami: “Esengo na moto akosekwa na lisekwa ya liboso, pe azali mosantu, kufa ya mibale ezali na nguya likolo na ye te.” E Nzambe! “kufa ya mibale,” kufa ya molimo, “ezali na nguya te”; asikolami!

<sup>177</sup> E Nzambe, kokanisa ete moko na bangonga oyo, moto moko akokende kotala moninga, pe akonetolama. “Bato mibale bakozala na mbeto, moko akokamatama, pe mosusu akotikala. Bato mibale bakozala na elanga; nakokamata moko, pe nakotika mosusu.”

<sup>178</sup> E Nzambe, sunga biso tozala peto liboso—liboso na Yo, Nkolo, ata bato bakanisi nini mpo na biso, ata bato mosusu balobi nini. Nkolo, tika ete oyo ya biso ya bulee . . . masolo na biso ezala ya bulee. Tika ete ezala na elengi ya Liloba na Nzambe; na elengi mpenza, Nkolo, na lolenge ete lokuta moko te ezala kati na biso. Wana tozali kobondela, mpo na mabunga na biso, Makila na Yesu Klisto ezala katikati na biso ná Nzambe, ete Akitisa miso likolo na biso kati na Makila na Yesu; na ntina na boyengebene na biso moko te, to na ndenge tozali te, na makambo oyo tosálá te, kasi bobele na ntina na makoki na Ye. E Nzambe, kokisa yango!

<sup>179</sup> Tika ete moko te kati na baoyo bafandaki awa na mpokwa oyo pe bayoki Liteya oyo, tika ete moko te kati na bango abunga, kobanda na mwana moke koleka kino na mokóló koleka. Tika ete mposa na bango ya bulee ezala bobele mpo na Nzambe pe Liloba na Ye. Toyebi te ntango nini Akoki komonana, to ntango nini Akoki kobenga biso ete toyanola, kuna, na Kosambisama. Toyebi te ntango nini, toloba, Akoki kokamata bomoi na biso, koloba: “Ntango ya kozonga na ndako ekomi. Osengeli kokende.” E Nzambe, sunga biso ete totikala peto. Kokisa yango, Nkolo.

<sup>180</sup> Tika ete tozala na bomoi kino na Boyei na Nkolo, soki ekokoka. Tika ete tokoka kosala nyonso oyo tokoki kosala, na bolingo pe na lisosoli, kososola ete Nzambe azali koluka-luka kati na mokili, lelo oyo, mpo na kozua bampate nyonso oyo

babungaki. Pe tika ete tokoka kosolola na bango na maloba ya elengi ya mabondeli, ya bolingo pe ya Liloba na Nzambe, mpo tokoka kozua mpate wana ya suka, mpo tokoka kozonga na Ndako, pe kotika Edene oyo ya kala ya Satana, Nkolo.

<sup>181</sup> Oyo etongami mobimba likolo na mposa mabe, pe basi kitoko, ndenge mokili ebengaka bango, na piblisité oyo bazali kosala kuna, “Tozali kosala piblisité, tolingi ete bilenge mibali baya, wana bapakoli bipakola na elongi, pe bilenge basi ya kitoko oyo balati bakupé,” na ba-radio pe na ba-televisio na biso awa; bosoto ya lolenge nyonso pe mbindo, pe Hollywood; ba-robe oyo ekangaka nzoto ya lolenge nyonso, ya bosoto, ya mbindo, mpo na basi. Pe—pe mibali oyo bazali komibebisa pe bazali kozua elateli ya basi, pe kokata suki na bango lokola basi; pe basi lokola mibali.

<sup>182</sup> E Nzambe, ntango ya nsomo nini boye tozali kobika kati na yango! Eh, yaka, Nkolo Yesu, yaka! Yaka, Nkolo! Petola biso na Makila. Longola bosoto pe lokuta nyonso mosika na biso. Tika ete tobika, Nkolo, tika ete tobika na nse na Makila, ntango nyonso, liboso na Yo. Ezali mposa ya mitema na biso, pe libondeli na biso ya sembo.

<sup>183</sup> Nzambe Molingami, tia likolo na eteye...to oyo, na etumbelo, na mpokwa ya lelo, epai Nsango Malamu eteyami. Nkolo, misuwalé pe mabokeya ya bilamba mike-mike oyo ekokende epai na babeli pe bato na mawa etiami awa. Tika ete libondeli na kondima, Nkolo, euta na mitema na biso sikawa, liboso na Yo. Lisusu, Nkolo, soki eloko moko ya mbindo ezali kati na biso, Nkolo, mema biso... mema biso sikawa na kosambisama; pe tosengi mawa na Yo. Monisa biso epai tozali kosala mabe, Nkolo, mpo tokoka kosenga, ete Makila etiyama pe epetola biso. Bikisa bato na bokono oyo pe pesa bango nzoto kolongonu, Tata, ezala wapi, ata ekokende wapi. Tika ete ezala bongo, Tata.

<sup>184</sup> Pesa biso mokano mpo na kosalela Yo, pe bobele Yo moko. Kokisa yango, Nkolo.

<sup>185</sup> Batela na nzela balingami oyo bakozonga na bandako.

<sup>186</sup> Totondi Yo ndenge Obikisi bato na bokono. Pe mwana mobali moke ya Ndeko mwasi Shepherd ná Ndeko mobali Shepherd, oyo azokaki na veló, nazali kobondela ete eloko moko ya mabe esalama te; mwana mobali moke oyo azalaki kotambola na veló na ye, nabondeli ete ayoka malamumu. Totondi Yo mpo na lobiko na nzoto oyo tosengi Yo mpo na bato mosusu. “Pe toyebi ete eloko nini tokosenga, tokozua yango, mpo ete tozali kotia motema epai na Ye oyo apesaki elaka.”

<sup>187</sup> Pesa biso ngolu na Yo, Nkolo, pe limbisa masumu na biso, tosengi yango na Nkombo na Yesu Klisto. Amen.

<sup>188</sup> Bolingi Ye? [Losambo balobi: “Amen.”—N.D.E.] Bondimi Ye? [“Amen.”] Boye bozali kobela pe bolembi makambo ya bokonzi

ya Satana? ["Amen."] Bondimi ete Bokonzi ya mibu nkoto ebelemi, Bokonzi na Ye ya mibu nkoto; ya Ye, na Edene na Ye? ["Amen."]

<sup>189</sup> Bondima ete ekosalema lelo oyo? Botala, makambo nyonso etiami likolo na mayele ya bongó. Nyonso, makambo nyonso, esengeli kotalisama polele na lolenge ya zebi liboso ete bato bandima yango.

<sup>190</sup> Pe bokoki kotalisa Nzambe polele na lolenge ya zebi te. Bosengeli koyamba Ye na kondima, "Mpo ete moto alingi kobelema na Nzambe, asengeli kondima ete Nzambe azali, pe ete Akopesaka libonza epai na baoyo bakolukaka Ye."

<sup>191</sup> E Nzambe, nalingi koyeba eloko mosusu te bobele Makila na Yesu Klisto, oyo epetoli ngai na masumu. Nayebi eloko mosusu te bobele Yesu Klisto. Pe lokola Polo alobaki uta kala, ngai pe nazali koloba bongo na mpokwa oyo: "Nayebi eloko moko te kati na bino, bobele Yesu Klisto, Ye oyo abakamaki na ekulusu."

<sup>192</sup> Nyonso oyo nayebi mpo na koyebisa bino yango wana. Ete, Biblia oyo, nandimi na motema na ngai mobimba (soki namiyebi malamumu), ezali Liloba na Nzambe oyo ebongi be pe oyo ya peto. Nazali kobika na nzela na Yango. Natelemi likolo na Yango. Soki nazalaki na bomoi nkoto zomi, nalingaki kopesa moko na moko mpo na Liloba oyo, mpamba te yango ezali Liloba na Yesu Klisto. Ata ndenge nini bakoki kotalisa ete Ezali mabe, ata ndenge nini zebi ezali koloba ete bakoki kotiela Yango motema te, pe bongo na bongo. Mpo na ngai, eloko bobele moko na mokili oyo nakoki kotiela motema, ezali Liloba oyo. Azali ya ngai. Nalingi Ye. Bongo bino? [Losambo balobi: "Amen."—N.D.E.]

<sup>193</sup> Soki lisumu ezali kati na motema na yo, soki mabe ezali kati na motema na yo, soki ozali ata na eloko nini, bondela sikawa pe senga na Nzambe alimbisa yo. Bobondela mpo na ngai; ngai pe nakobondela mpo na bino. Nzambe apambola bino, yango nde libondeli na ngai.

Kino tokokutana! Kino tokokutana!

Nzambe ázala na bino kino tokokutana lisusu!

<sup>194</sup> Bolinganaka kati na bino? [Losambo balobi: "Amen."—N.D.E.] Yoane alobaki: "Bana mike, bolingana kati na bino." "Bolingana kati na bino, mpo ete bolingo ezipaka ebele na masumu." Sikawa topesana mbote.

Nzambe ázala na bino kino tokokutana lisusu!

Kino tokokutana! kino tokokutana!

<sup>195</sup> Sikawa bozala malamumu kati na bino. Bozala malamumu epai na moto nyonso. Bozala malamumu na bazalani na bino. Bomibatela peto kino ekoya Yesu.

. . . na makolo;

Kino tokokutana! Kino tokokutana!

Nzambe ázala na bino kino tokokutana lisusu!

<sup>196</sup> Bolingi Ye? [Losambo balobi: “Amen.”—N.D.E.] Yango nde libondeli na ngai. Bobondela mpo na ngai; ngai pe nakobondela mpo na bino. Nasengeli sikawa kozonga na Tucson. Pe na—nabondeli ete Nzambe apambola bino nyonso. Kolongwa kuna nakoleka na Canada, pe nakozonga na Colorado; kotambola, kotambola, kotambola, bomoni. Kino ete . . . ? . . .

<sup>197</sup> Ndeko Tony azali na suka kuna, pe likambo monene esalemaki. Pembeni ya Vatican mpenza, na Roma, bazali kosenga kolamuka, mayangani, ete nakende kuna mpo na kosala mayangani ya kolamuka na Roma, na Roma. Auti kuna kaka mikolo oyo. Bato nyonso bandimi likambo yango. Libanda moko monene ya masano ezali kuna, oyo ezali na bisika ya kofanda bankoto na bankoto, pe bazali na mposa ete nakende kuna mpo na kolamuka. Bazali na mposa ya komona nkembo na Nkolo kati na mosala ya koteya. Nayebi te. Nasengeli kobondela mpo na likambo yango, komona eloko nini Nkolo akolobela ngai. Hólalá! Bobosana te, tobondela, biso nyonso elongo. Tozali kosala mosala . . .

Tozali kozila boyei ya Mobikisi na biso oyo apambolami,  
Tala, nkasa ya nzete ya mosuke ezali kobima sikawa;  
Nsango Malamu ya Bokonzi na Ye esili kokende na bikólo nyonso;  
Pe tokómi pene na suka, tozali komona yango.

<sup>198</sup> Boye te? [Losambo balobi: “Amen.”—N.D.E.]

Bongo na esengo tokosakola Nsango ya komonana na Ye oyo epambolami,  
Na mwa ntango moke Akozonga na nkembo, kolobela yango moto na moto pe bato nyonso;  
Na bongo bolamuka, bino basantu na Nkolo, mpo na nini kolala wana suka ebelemi,  
Tomilengela mpo na mbela ya suka oyo.

<sup>199</sup> Akouta na wésti, pe moko na mikolo oyo, akozonga lisusu likolo na mpunda, bobosana yango te. Na ntembe te. Ezali ya solo. Wana tozali kozela:

Mema Nkombo na Yesu,  
Mwana na mawa pe bolozi;  
Ekopesa yo esengo pe libondisi;  
Mema Yango bipai nyonso okokende.

Nkombo ya ntalo (Nkombo ya ntalo), O ya elengi!  
Elikya ya mokili pe esengo ya Likolo;  
Nkombo ya ntalo, O ya elengi! (ya elengi!)  
Elikia ya mokili pe esengo ya Likolo.

Tokogumbamela Nkombo na Yesu,  
 Tokofukama na makolo na Ye,  
 Mokonzi na bakonzi, na Likolo tokolatisa Ye  
 enkoti,  
 Ntango mobembo na biso ekosila.  
 Nkombo ya ntalo, O ya elengi!  
 Elikya ya mokili pe esengo ya Likolo;  
 Nkombo ya ntalo, O ya elengi!  
 Elikia ya mokili pe esengo ya Likolo.

<sup>200</sup> Sikawa, eteni ya suka oyo, toyemba yango sikawa wana togumbi mitema.

Mema Nkombo na Yesu,  
 Lokola nguba liboso na motambo nyonso;  
 Wana masenginia mazingi yo, (makambo oyo  
 ya bokonzi na Satana, bomoni, bomoni)  
 Loba bobele Nkombo mosantu wana na  
 libondeli.

<sup>201</sup> Esili; na nsima bokende mosika. Ezali kosala mosala. Namekaki yango. Sikawa bondima yango kaka, mpo ete ekosala mosala. Loba bobele Nkombo mosantu wana na libondeli.

. . . Nkombo na Yesu,  
 Lokola nguba liboso na motambo nyonso;  
 Wana masenginia mazingi yo, (Okosala nini na  
 ntango wana?)  
 Loba bobele Nkombo mosantu wana na  
 libondeli. (Ezipeli ekozipa elongi na yo na  
 ntango wana.)  
 Nkombo ya ntalo (Nkombo ya ntalo), O ya  
 elengi!  
 Elikya ya mokili pe esengo ya Likolo;  
 Nkombo ya ntalo, O ya elengi!  
 Elikia ya mokili pe esengo ya Likolo.

<sup>202</sup> Sikawa togumba motó, na ntango nazali kosenga na Ndeko Beeler kuna na suka ete aya awa na eteyelo. [Ndeko Branham abandi koyemba na mongongo na nse *Mema Nkombo na Yesu*—N.D.E.]

Loba bobele Nkombo mosantu wana na  
 libondeli.

<sup>203</sup> Soki olingi kosukisa, Ndeko Beeler. Sukisa na libondeli.

Nkombo ya ntalo,  
 Elikya ya mokili pe esengo ya Likolo;  
 Nkombo ya ntalo (Nkombo ya ntalo), O ya  
 elengi!  
 Elikia ya mokili pe esengo ya Likolo.

<sup>204</sup> Sikawa wana togumbi mitó, pe mitema na biso egumbami. Ndeko Beeler, moko na bakengeli-basungi awa, Ndeko Estle



Beeler, ndeko moko Moklisto malamumu, moto na bosembo. Nazali kosenga na ye soki akolinga asukisa liyangani, ya mpokwa oyo, na libondeli. Nzambe apambola yo, Ndeko Beeler.



*EDENE YA SATANA* LIN65-0829  
(Satan's Eden)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na mpokwa, mokolo mwa 29, sanza ya mwambe, na mobu 1965, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)